



16
2875
1



287B

Faint, illegible text in vertical columns, possibly bleed-through from the reverse side of the page.

Red seal impression with Chinese characters, likely a collector's or library's mark.

2

Blank page with some foxing and minor stains.

門 16
號 2875
卷 1

重刻北海集序

自古以文章名世而傳於後者
或終老無所遇即遇矣或連蹇
不得志以歿其幸而進用舉世
望之以為顯融雖其人亦自謂
遭時之盛而中之所蓄積果克

昭和二十八年
十月一日
購求

自效於用者不亦鮮哉豈立功
與言固不可得兼歟夫古之君
子脩之於身見之於行事發之
為言語文章一而已矣其君知
之與之儕者能容之吾何敢負
也於是焉不得已而功成君弗

知也與之異而儕排之者衆也
無所望於進而思有所垂於後
於是焉不得已而言出豈有二
哉自科舉之學興而士不必有
其志言不必施於用其法屢變
而屢窮薄詩賦而求之以明經

以論策似矣而士且日趨於苟
簡以徼幸一日之遇其平居相
與瘦精竭思以為之者一遇於
時而皆置之於無用即有過人
之才非早獲自見又幸為詞學
之臣者其無乃以政學乎雖遇

之蚤矣進而窺金匱石室之藏
矣其用與舍未可期也若
上方嚮用而用之未盡其才乃
以中道夭閔者攬其遺文豈不
深可惜哉故宗伯北海馮公弱
冠登朝及強而貳冢宰公別

賢不肖以肅吏治以佐

天子惠養元三又先後數考文章登用俊良備朝廷器使世咸以為能舉其職

上方將用公於調燮而公不及待以歿矣當公在 經筵款借

論說以親切時事上自戰國下逮東漢之季為書一編反覆諄切其言簡而明讀之凜然庶幾繹而改乎斯日月以異矣時朔方遠左之師東西騷動忠憤所發皆見於其書及身為大寮而

礦稅之使侵官蠹民凡所以調
護其間皆辭婉意深默有回天
之力焉公之不獲盡其寸用也
豈非天哉使公得永年
上之能盡公與否所不可知其
不勝世道之憂而見於論列者

又當何如耶予之獲薦南宮竇
出公門下公歿後四年再補吏
東吳會同年友曹君還素以戶
部郎來視權出示公全集謀重
刻而廣其傳予既捐俸募工而
曹以五十緡佐焉吳之人士遂

又當何如耶予之獲薦南宮實
出公門下公歿後四年再補吏
東吳會同年友曹君還素以戶
部郎來視權出示公全集謀重
刻而廣其傳予既捐俸募工而
曹以五十緡佐焉吳之人士遂

序五

曆歲己酉冬十月門人知嘉定
縣侯官陳一元撰



序六

擬進講記序

吾師琢庵馮公少負異才好學
能文通於當世之故年十九歲
入爲翰林卽隱然以天下自任
連爲講官者十餘年其侍上
最久啓沃最多忠愛肫切上

李序一
顧而眷之其所進講章有通鑑
若干卷講章之義舊取于明白
簡近便 上省聽自本旨字句
之外不敢旁引更端以自爲說
有之自公始蓋借古人媿刺得
失之端爲今日藥石攻療之論

一生獨
以忠恕二
可入

此公之用心微曲堅苦非人之
所能知也予讀其書竊有感焉
夫世之君子愛其君盡言而不
諱者多矣然幸而見聽者十九
何也夫人與人相與直言其人
之善言之而過其實雖好諛者

亦必內慚而不肯當。至與言。昔人之善。未有不羨者也。直言其人之不善。言之而至于甚。雖樂受者亦必外忿而不能容。至與言。昔人之不善。未有不笑者也。豈惟羨之而已。自顧其行有不

類。是其能已乎。豈惟笑之而已。自顧其行有類。是其能安乎。然則吾雖十言而十見聽可矣。由是論之。世之君子欲告其君以言者。孰有善于公者哉。今觀公之論漢武帝也。有曰武帝待衛

青公孫弘親之不重待汲黯重
之不親然總之冠亦見不冠亦
見踞廁亦見可見古者君臣相
親無少間隔故其下易事其主
而上易知其臣也夫天下之患
莫大于君輕其臣而相隔尤甚

蓋有所輕則猶有所重若一相
隔則無復有親者矣又曰武帝
之臣惟弘最稱上意而最寵任
黯屢忤上意而屢賜告外補然
淮南之謀不畏寵任之弘而畏
屢賜告外補之黯何也見椎魯

李序四
戇直之人一味忠鯁在人主面前尚且執德不回觸忤不顧更有何利可以牽動何人可以有惑若阿諛遷就之人委曲多端在人主面前尚且支吾變轉復見大利大害豈有不趨避之理

此弘所以見輕而黷之所以見重也人臣觀此則知所以自處人君觀此則知所以任人矣其論和帝也有曰帝與鄭衆決策而誅竇憲豈非英斷然外戚之禍除而內宦之權重原內權所

由起始于有功，有功始于決策。蓋帝之所以不與股肱大臣謀者，以素不與外臣親接耳。人主常延見大臣，無事則諮訪得失，有事則參決謀議。若常不相親，卽有事亦難獨召。召之則機露。

而事敗，勢不得不謀之于內。謀之于內，無論未能成功，卽成功亦有後患，豈非後世之永鑒哉。其論宣帝也，有曰：人臣言有不當，只合置之，而不必加以罪。卽真有罪，亦宜使廷臣評其得失。

李月六
法官定其輕重豈有獨付執金
吾之理自此端一開而後世凡
有觸忤輒下詔獄往往以笞掠
殺之則宣帝之殺蓋寬饒爲之
作俑也其論靈帝有曰帝作列
肆于後宮釋袞冕而衣商賈之

服舍大輅而操四驢之轡不過
一時爲戲而書之史冊遂爲千
古笑端甚矣舉動不可不慎也
蓋人君常御大廷禮法嚴重身
心自然收斂言動自然端莊故
非僻之干無自而入若身居大

李序七
內不接羣臣所居皆燕閒之地
所與皆狎昵之人故非禮之動
乘是而起宮闈深邃見謂無傷
而不知天下傳之史臣書之矣
齊桓公好紫而紫遂勝朱漢靈
帝好驢而驢遂勝馬若移其好

世宗
不
好
之
好

以圖天下之政務收天下之賢
才則何才不得何事不理乎又
曰天下財利名爲泉貨原當流
通必無聚而不散之理布之人
間則上下流通爲天下之用收
之府庫則緩急有賴爲軍國之

用若藏之內帑積之不用則始
爲私藏終爲禍端財聚者民散
多藏者厚亡聚乃所以爲散利
乃所以爲害耳靈帝私藏于西
園未幾而散德宗私積于瓊林
大盈未幾而散自古明王以不

蓄爲富以不貪爲寶真有見哉
其論元帝有曰恭顯所以權傾
中外者以帝委以政事羣臣因
以關決而宦官得政之由實始
于武帝游宴後庭不見羣臣大
凡人主不見羣臣則中外隔絕

而權必旁落雖以武帝之英明
僅不當其身而于子孫見之其
為監豈不甚著又曰在周禮內
官統于冢宰故多治自秦以後
大臣著于內官故多亂大臣以
中貴喜不喜為去留中貴以囑

于右

託行不行為喜怒則未見其可
以為治也其言精采切慢有為
而發悉中于當世之故如此然
自公言之託事造端微見指歸
而未常以言為名自吾君聽
之隨類相求往往而解而未常

下不稱
如一新
其有成
同公言
其耳

有聽之迹。嗚呼！此世之君子以言告其君者，未有善于公者也。昔歐陽修有言：天下之得失，生民之利害，社稷之大計，惟所見聞而不繫職司者，獨宰相可行之諫官可言之。故士學古懷道。

者仕于時，不得爲宰相，必爲諫官。蓋謂士之欲有言者，非諫官莫能耳。嗚呼！孰知夫今之言不在諫官而在講官乎？然愚推歐子之意，以謂人臣事主，苟得言以爲幸焉，况乎吾能言之而又

仕海
如

能行之其幸尤何如也昔唐宋
之制士由諫官爲宰相十常六
七則夫能言而又能行之者亦
已多矣本朝宰相惟翰林得爲
之而諫官不與焉其言而行之
者其誰耶今公之書凡天下之

得失生民之利害社稷之大計
見于所講說者豈止于諫官之
所能言者乎公之位旦暮得爲
宰相然則能言之而又能行之
者其惟公耶愚小子請卽以公
前日之所言還以責公後日之

社工部
謂出師
右控身
之表云

所行耳

翰林院檢討門人李騰芳記

刻兩部題稿序

琢庵馮先生以歲己亥應少宰之召越
辛丑主外計黜陟進退多屬品裁中外
稱其平允凡一切奏稿皆出先生之手
後拜宗伯亦然其請而得報者則有如
增浮躁之條與降調某司官議處某通
判諸疏即不得報而事因以請者則有

如辨某璫誣奏撫臣却某璫請給關防
諸疏當得報之日朝紳翕然以為皆銓
曹數年所希有事而關防執奏甚力
主上至以御前牙關防給之則先生之
言能動主與
主上之知先生亦已深矣其他若申考
課貪墨之法舉

冊立冠婚之典及陳災異礦稅正文體
士風與臨終遺疏前後三十餘篇大都
婉切溫嚴筆端如畫談吏弊則事事中
情語時務則字字堪涕危詞易感淺語
可思昔蘓文忠公每自言吾于文章意
之所到則筆力曲折無不盡意以今觀
之先生若合為一人乃其忠誠懇至出

于言語文字之外。即蘓公似猶有少遜
于前者。蓋先生居恒獨處一室。至草疏
則闔扉危坐。執筆沉思。有所得。須臾滿
紙。間一閣筆。輒仰天。搥心。撫几。頓足。意
象慘悴。了無人色。彼其愛

君憂國。直欲嘔血。籲天。冀幸。

主之一悟。政之一新。而無從也。既啟扉

而出。定省母前。太夫人驚異。以爲兒何
從得此悴容。先生殊不知其後。太夫
人旦夕占視。至相對泣下。欲勸阻而不
可得。嗟乎。此其幽獨隱衷。非天地鬼神
孰能知先生哉。今先生諸稿一出。世故
當家傳戶誦。無容讚述。余獨謂先生一
腔忠赤。慈親所不及諭。即妻子兄弟或

不能窺而世多皮相之士恐僅僅以文章視先生而未察其心也故聊為序次如此

門人長沙莊天合撰

馮宗伯詩叙

今天下名能詩家學士北海馮公為竄公之詩以神情會者也夫自三百篇以降至於漢魏及唐體裁不同要以裛然意象之表不可階梯正在

神情爾世人不知則求多於
辭辭不能超而求助於氣大
歸在充厲幼眇愈費而愈不
足竊嘗譬之以詞與氣求工
者如畫師寫照衣冠色貌細
至眉髮無一不似令人蹴然

而悚迫而察之了無生意何
者其君形不在焉似之而失
其真矣以神情會者如摩詰
平遠山水間以人物濃淡榮
枯在有無明滅之際而望之
躍然洞心若將身遊其中而

不能已則得其真而不必似也。公之為古體淵源漢魏而軼出於唐其為近體沉浸盛唐而致極於杜。兼備衆美而出以一竅其究華而若歛冲而若餘大而。不陵細而不底。

神在象先而輔之以氣情懸物外而運之以辭此所以勝爾。嗟夫物未有不得其真而勝者也。彼以境而合人以人而傳事不怒而髮上指無悲而涕橫流於神情何所符焉。

而欲以高駝執圃凌駕詞壇
不其左與余遊公二十餘年
相與極論久之欲一涉其樊
而不可得今老矣秉燭之光
其與幾何望洋而嘆而已矣
吾大夫瀛海張君出公門下

以詩豪燕趙間日求海內名
家而位置之如恐或失偶出
公草一帙視之大夫捧而醉
心曰吾師乎吾師乎一代作
者其在茲與小子何莫學焉
亟付梓刻將與同志共之而

使余題其端余惟自古儒林
文苑皆有世家經術之效莫
盛於韋氏之祖孫著作之業
莫雄於班氏之父子而公實
無之至於繩四大父之武而
會其全二氏謝不及遠矣况

且以典謨風雅之猷弼成景
化望高夔周召流風哉故公
之學不盡於文其文不盡於
詩而詩亦不盡於此就大夫
所次著其概爾
萬曆己亥仲秋望日穀城山

下居士手慎行書於冷風之館

馮琢庵先生北海集總目

卷第一

四言詩一首

擬古樂府二首

五言古詩四十一首

七言古詩二十五首

卷第二

五言律詩一百二十七首

卷第三

五言律詩一百六首

卷第四

七言律詩一百八首

卷第五

五言排律八首

七言排律一首

五言絕句三十八首

七言絕句七十三首

詞五首

卷第六

序十一首

卷第七

序十一首

卷第八

序十二首

卷第九

序十五首

卷第十

序十一首

卷第十一

序七首

卷第十二

卷第十三

記十三首

傳贊箴跋十三首

卷第十四

墓表八首

卷第十五

墓誌銘七首

卷第十六

墓誌銘八首

卷第十七

墓誌銘十首

卷第十八

行狀五首

卷第十九

祭文十二首

卷第二十

祭文十三首

卷第二十一

啓二十八首

卷第二十二

書牘十二首

北海集
卷第二十三

• 書牘二十首

卷第二十四

• 書牘二十九首

卷第二十五

書牘四十三首

卷第二十六

書牘四十七首

卷第二十七

書牘三十七首

卷第二十八

書牘五十五首

卷第二十九

書牘四十六首

卷第三十

• 勅諭一首

• 誥勅三十三首

卷第三十一

• 誥勅四十一首

卷第三十二

奏疏七首

卷第三十三

奏疏七首

卷第三十四

奏疏十一首

卷第三十五

奏疏十三首

卷第三十六

奏疏十六首

卷第三十七

奏疏十四首

卷第三十八

奏疏七首

卷第三十九

奏疏九首

卷第四十

奏疏十二首

卷第四十一

議六首

卷第四十二

經筵講章六首

卷第四十三

日講通鑑直解三十八首

卷第四十四

日講通鑑直解三十六首

卷第四十五

日講通鑑直解四十二首

卷第四十六

日講通鑑直解五十五首

卷第四十七

日講通鑑直解四十四首

卷第四十八

日講通鑑直解四十四首

卷第四十九

日講通鑑直解四十四首

卷第五十

日講通鑑直解三十八首

卷第五十一

日講通鑑直解二十八首

卷第五十二

日講通鑑直解三十二首

卷第五十三

日講通鑑直解三十三首

卷第五十四

● 論二首

● 表八首

卷第五十五

● 策六首

卷第五十六

策六首

卷第五十七

策四首

卷第五十八

● 附誌狀二首

馮琢庵先生北海集總目終

校閱姓氏

吳郡後學唐時升叔達父

婁 堅子柔父

劉維藩价伯父

宣嘉士元之父

鄭胤驥閑孟父

馬元調巽甫父

禮掾周鳳儀督理

寫工劉成憲

章 鐸

刻工郭成望

王臣

朱士奇等

馮琢庵先生北海集卷一

齊郡馮琦用韞著

詩

四言詩

中林

擬古樂府

秋胡行 四解

和魏懋忠 四首

五言古詩

再過真空寺道

北海集 卷一
寄懷伯舅 四首

偶興

癸未春述懷 五首

登雲門山 二首

慰陸敬承悼亡詩 四首

秋夜簡敬承公亮

碧雲寺

香山寺

西山道中

中峯

送余世用之汴 五首

直卿新至同飲

西山

客談雲中塞事

巳丑冬書懷寄呈家君

寄示珂弟

悲小陸

送張伯任給諫閱視固原

送鍾淑濂給諫閱視上谷

壬辰書事贈別鍾淑濂張伯任

今昔行送別嘉猷寄汝培

世用索五十詩併寄直卿伯楨

待命長白答鍾淑廉

送薛中孺出叅楚藩兼懷李景曾

喜孝與至賦贈

七言古詩

燕然行

送二舅之官寄懷伯舅

結交行呈楊公亮

題沈翁畫竹

泰山歌送盧東麓

雙林寺歌

送伯楨侍御之川中憲副

邀同館餞別公亮伯楨

古意

桃花嶺歌

新吾大叅遺鏡

蟠松歌寄公亮

觀燈篇

文筆峯

金雞山

馬鞍山

流水橋

桑乾歌

送董巢雄謫官之上谷

壽沈節婦

同直卿世用飲敬承書舍

和余雲衢歌

結交行懷于穀峯年伯兼訊侯將軍

去婦歎送別陳南濱侍御

題尹中丞栩栩園

四言詩

中林

瞻彼中林烏鳥鳴悲歲云暮矣寒雪霏霏殘月在墀
北風蔽幃念我先人愴矣心摧

瞻彼中澤鴻雁嗷嗷言念其曹惟以永號予髮蕭蕭
予心忉忉維子之故予肌骨以銷

人亦有言伯塤仲篋惟塤與篋尚或間之維予及汝
如左右手曷求爲我以慰父母

母氏聖善汝鞠汝育汝哺汝沐汝顧汝復汝臥母寧
汝啼母驚屢寢屢興跂而及于成

駒而汗血一日千里歲月屢更復居爾所母之懷矣
涕泣以語父之懷矣誰使告汝

天降鞠凶我父亡祿念我兄弟尚盱其目我踊而哭
汝跪且祝敢不自力以憂冥漠

我父始瞑體鬼始寧載闡厥靈赫矣如生垂歿之語
安可再聆汝有成言安可再更

我父垂白眷此弱息片語而當喜形於色載笑載言
遍示坐客安得九原復此夷憚

汝夢我父執手沾濡汝寤而呼庶其改圖旦晝之牯
突而紛如昨夕之夢若有若無

疴癯承蜩郢人運斤用志不分乃疑于神繫馬欲馳
驚鴻欲舉寧靜致遠古有高矩

吾道如城乃郛乃廓汝才如劔乃鋒乃鏗太剛則折
代斲乃傷相庖丁牛善刀而藏

寧刺繡紋無倚市門市門可倚市兒非侶蜉蝣楚楚
蛺蝶如舞比之匪人戒其傷汝

石虎可開羝羊難乳與子同氣豈難誨語我實不敏
無以益汝緬思遺令涕零如雨

悔之初萌亦自怨恫曾幾何時往來憧憧誰操汝心
汝奉以從心之憂矣靡所與同

脊令在原兄弟急難急難而泣亦何云及如臨于淵
如集于木君子有穀及爾能淑

中林十五章章八句

昨歲暮作四言詩不能盡其意然意亦自有不能盡者每因鵲鴿之情益增烏鳥之痛未嘗不
泫然沾衣也正月廿三日偶于書冊得二柿葉
漫書二絕附錄于後 淚行成雨鬢成絲殘月
孤燈冷素帷安得階前鴻雁影雙飛闕下鳳凰
池 欲樹萱花向北堂那能寸草報春光莫將
驕子心頭火添作慈親鬢上霜

擬古樂府

秋胡行

寒士易德貴交難為歡寒士易德貴交難為歡張陳

刎頸蕭朱彈冠虛願不酬要盟易寒喜極而復或為
怨端歌以言之貴交難為歡 一解

美成在久惡成不及改美成在久惡成不及改塵積
為岳愛流成海女之耽兮則不可悔鷹化為鳩其目
猶在歌以言之惡成不及改 二解

下僚易居貴極難為退下僚易居貴極難為退鬼忌
其盈人伺其敗昔人所患駟馬高蓋炎炎隆隆卒與
禍會歌以言之貴極難為退 三解

緩調易終急響難為節緩調易終急響難為節大絃
高張小絃斷絕急食多噎急行多蹶羸糧安步千里

可涉歌以言之急響難爲節 四解

和魏懋忠

千金買寶鞍百金買戰馬買鞍新市頭買馬古塞下

右紫騮馬

玉階月光華蓬戶月寂寥玉階與蓬戶一樣青天高

右玉階怨

爲問蜀道難何如鳳城下交徑無方軌長衢有怒馬

右蜀道難

一舟膠長河百舸皆艤岸寄言利涉子忍待春水泮

右擢歌行

五言古詩

再過真空寺道

驅車上河橋遙望橋邊路風沙何蕭蕭我父從此去
今日涿鹿道明日瀛海渡我欲往從之蒼蒼隔烟樹
緬惟膝下驩深憶別時語舉頭望白雲低頭淚如雨

寄懷伯舅四首

曲節易爲工直道難爲妍汲公豈不偉恐非時勢賢
罄折走風塵故非體所便中夜不得休使我無好顏
一朝解組去息駕牛山前竭來視禾黍亦已熟西阡
古來力田者不如逢歲年獨坐長太息萬事良共然

北漢集 卷一
二
驅車出淮陽金堤枕大河洪濤自西來衝風揚其波
砥柱百餘尺干雲鬱嵯峨落花逐東流已復千里過
乘流雖云利爲時能幾何

三

結廬城東隅寂寂無車馬泉流旣紆紆榆柳亦瀟灑
出門上高原悠然見四野鳥聲高樹顛人影深林下
白雲自往來吾意爲一寫人生行樂耳鬱鬱何爲者

四

冉冉亭中竹嫋嫋門前柳十年辭我去我行亦已久

三徑幸未荒暫得休田畝田畝多暇日晤言同心友
觴酌一再行陶然說故舊達觀且忘我萬物於何有
升沈會有時不足廢杯酒

偶興二首

清商赴高節白日馳西陸平野何茫茫微風動修竹
野人荷鋤來一一談禾菽信美又吾土且復返初服
世事良悠悠安從詹尹卜

二

攬衣登高樓延目瞰四野長蘿蔭茅屋秋色何瀟灑
朱英紛未落白露淒以下四氣自成歲吾欲何爲者

癸未春述懷五首

憶自登朝署意常懸丘壑何知歸家山情悰反蕭索
大母歲將逝沉痾猶未脫傷哉六年別僅一視湯藥
大命不得請泣血沾衣幕旦暮哭上食容輝竟寂寞
生者亦云病沒者豈復作不知天地心隱憂安所薄
哭聲入高雲雲色亦莫莫

二

銜恤曾未久我心鬱以忡有女五歲餘早已成疲癯
一朝逢搖落千秋豈再容自傷薄祐人養汝不得終
母氏太劬勞臥起與汝同豈伊憐弱息所嗟懷袖空

悄然內傷心太息起悲風

二

女弟纔四歲舉步一何嫺向人輒下拜頗識嗔喜顏
傷彼蕙蘭花零落清霜寒疇昔多歡悰一一成悲端
余亦慕弘達不能割此難焚汝身上衣碎汝指上環
九泉長決絕撫膺獨沈瀾

四

憂來殊未弭屏居向東郭弔客尚在閭弱子聿云瘼
使我覓夢中襟抱亦作惡披衣起視兒痿黃已非昨
安得尚夢寐精神猶錯愕著艾火始然寸心與同灼

迷離眼四視似欲戀帷幕陰雲盪層樓回風激哀壑
踈簾度乳燕空階馴慈鴿對此不能言凄然淚雙落

五

汝死亦何知吾生空悲辛豈悲嗣未立父母尚無孫
王程不得留何以慰朝昏長跪父母前無爲兒女仁
含淚前致詞氣結不能伸一燈何耿耿照我雙淚痕
我欲竟此曲曲成彌傷神死者長已矣哀哉無重陳

登雲門山二首

策馬出遠郊言登白雲峰茲峰何萃律玉立萬芙蓉
和颺布天令原野被春容烟霏遠蒼蒼近看彌葱蘢

澗道餘積雪峽口披長風石瀾插漢標飛觀翔天中
橫襟望河山伯圖一何雄一匡豈不偉千秋事已空
吾將策藜杖行行訪赤松

二

躡屐陟層巔捫蘿度雲扉欲行復屢息拂塵坐石磯
但見千峰色落落沾人衣晞髮向陽阿揮手弄晴暉
四顧天池闊齊州亦已微海氣橫東南樂矣曠士懷
青芝自曄曄四牡乃見催陸沈金馬門大隱諒可希
陸子著悼亡詩賦數千言其詞痛絕屬余輩爲
挽章乃賦四詩慰之

孟冬多悲風燕市飛寒霜葉落不可掃繁枝豈再芳
之子念同衾對此心煩傷興文有餘悲慷慨歌清商
逸響激行雲青天高茫茫座室慘無歡僮僕皆沾裳
卿亦何太苦且復傾一觴

二

尊酒未終竟婉婉日已弛主人起謝客攬涕前致詞
貧家得好婦中外皆所宜芳徽杳難繼豈曰懷燕私
萬物各有歸乃在天一涯虛室轉空闊北風吹素帷
殘月照簷霜隣雞鳴何遲俛仰念疇昔悠悠使心悲

三

心悲何終極無乃太傷神豈不重伉儷念子遠游身
痛心成疾疢何以慰子親顧此二幼雛始識喜與嗔
展轉戀懷袖哀哀鳴向人我見尚猶憐悲思况在君
君悲詎可掇勗君以自珍

四

自珍無空悲命矣可柰何天地何茫茫六龍揚其波
百年遞相哀隙駒忽復過漆園豈不達鼓盆亦已多
死既不足悲亦復安足歌悲歌既匪經循禮諒無頗

秋夜簡敬承公亮

秋色遽如許客心鬱未安微微日影薄肅肅天宇寬

北海集 卷一
高風下木葉零露被叢蘭四氣自幹運誰爲衰盛端
朱華曾幾何素萼忽已殘楚楚松柏姿凌風以自完
願言附高節與君同歲寒

碧雲寺

朝望山間雲暮就山間宿佛界何莊嚴入門風蕭蕭
古殿倚巖岫磴道盤空曲山僧出相迎班荆坐修竹
峯頭過新雨石髮淨如沐泉聲下石溜歷歷飛寒玉
對酒不知晚星河低以屬良游殊未竟同醉待朝旭

香山寺

香山曉蒼蒼居然有幽意一徑杳迴合雙壁對葱翠

雖稱土木盛未掩雲林致憑軒眺湖山一一見所歷
千峯青可掃涼飈颯然至披襟對山靈冥心歸釋帝
茲游如可屢無問人間事

西山道中

休沐屬良辰招邀盡吾黨晤言山中人兼有濠間想
瞻彼已超忽去此復悵惘行行出谷口原田何莽莽
微雨灑然至林樾增蕭爽興來發高唱丘壑傳餘響
遙見採樵人不得訊所往白雲深復深何處留真賞

中峯

中峯何高高孤標聳寥廓寺樓遞隱見石徑互參錯

雖乏濟勝具始快速遠游諾振衣凌爽噎舉杯眺廣莫
不知山路盡但見天澄豁對面薊門山數點青如削
樹木若鱗次西湖不盈勺萬象各自媚孤雲安所薄
山南行雨罷且復歸舊壑

余子有汴之役馮子觴而與之語交相誠也乃
次第爲韻言以當韋弦焉

策馬城南隅送子灞水陽問子將何之往建諸侯王
以茲旂與路與彼黻繡裳玉節何葳蕤大道生輝光
長卿方在漢枚叔將游梁皇華如有懷停車問周行

二

出門望征雁雙飛下南浦嗟我同袍友蕭然如散雨
居者四五人行當復送汝疇昔相過從率心以笑語
不復知爾我况乃論賓主且當惟古懽聊以緩離緒

三

白日浸以驅車馬安得停敢以友朋戀使子緩王程
惟有藥石言可以喻中誠高張無懦響弦急難爲聲
海水何澹澹虛舟安足驚東阿有遺言中和良可經

四

驪駒已在道尚復執君手茲當遠別離有可相語否
謂我敬其儀珍重論交友名士無襍言三緘戒其口

北海集 卷一 十四
我寔不自力勞君念我厚敢不戢良規一言三頓首

五

別日常苦促會日常苦遲昔無旬日隔今當彌歲時
豈曰無他人念子意不移相須既車輔相和亦墳箎
詠彼伐木章悠悠中心悲各勉日新德以慰長相思
直卿新至同世用敬承飲李貞予年兄宅憶楊

公亮

久客親故鄉久別親故友念子涉瀟湘契闊亦已久
今夕是何夕相對意轉厚客子縱談笑主人忘行酒
所歡咸在茲萬事復何有獨憶楊子雲滄江黯自守

相別同前春相見幾年後不知失我輩亦復歡樂否
道故忽成醉念別終在口落落宇宙間從今幾携手

西山

豈不愛西山其如厭游客孟冬氣已肅始掃行人跡
向來獨往願此時欣所適泠泠山下泉磊磊澗中石
草木有機息山川見真蹟一徑峯屢折迴風壑相激
天外寒烟淨樹杪澄湖白有時發鐘磬盡日看松栢
暫憇俄頃間恍已成今昔明日在朝市悵望山雲碧
客談雲中塞事

西山天下脊宣大屬肩臂昔虜未貢時胡馬頗凌厲

先皇神且武威加沙漠裔遂定君臣國盡掩和親
議至今二十年關門未曾閉吾非藉要盟彼寧徼歲
幣野老掩扉臥胡女臨邊醉赤羽無徵兵彫戈戢不
試國論有半塞邊事無全利豈不省儲胥頗亦銷精
銳帶甲數十萬無復問長技頻年繕長城城成衆心
悴朝見夷馬入暮聞夷馬斃卒乘無加餉戎旃有私
費不辭今剝削異日遂成例嗟爾邊塞人不見戎馬
際誰能尊俎暇試畫長久計夷德終無厭漢物恐難
繼大將修國容書生預戎事翹首雲霄上 朝廷有
餘庇

已丑冬書懷寄呈家君

懦夫欣自營苦心常不歡感激 明主恩中夜未能
安陟岵豈不勞易水方安瀾父子近相依未見爲臣
難束髮依日月列在供奉班珍賜出尚方退食分大
官所愧帷幄臣不奉 天日顏豈有格心術致之旃
厦前且讀古人書逝將歸舊山我父方北來未忍卽
東還我父秉明哲攬轡臨西燕此實股肱郡河山鬱
以盤頻年苦早馘蒸黎頗凋殘閭巷有菜色墟里稀
人烟比聞流移歸粗給粥與餽年年賜租稅漢法亦
已寬不知畿輔民何至骨髓乾瘡痍數百萬引領朱

北漢集
卷一
三十七
惟褰墨吏不解綬 主德何由宣西望古雲中遠接
大荒天邊塞五千里紫荆爲喉咽昔在 肅皇時胡
塵驚甘泉大徵天下兵一夫誰當關邊將忽高枕遺
壘今猶傳古來除戎器乃在全盛年書生談利病事
或不盡然父能稱保障兒或容素餐明發念先世累
代被衣冠里人紛矜詡安知我所觀天時有幹運人
理誰能全我聞詩達器常恐璞不完再實根或傷寧
知衰盛端惟有崇明德可以無憂患保身旣不易報
主良獨難長歌擊玉壺曲終再三歎雄風自西來易
水蕭蕭寒

寄示珂弟

憶昔少年日意頗矜敝帚聞道忽已晚科名亦云偶
志士營世業茲意漸已負時哉不我與太息一回首
吾弟雲霄姿濯濯春月柳比來隨宦遊無乃廢書久
昔我曾祖考蕭然在甕牖借書讀未竟其主已復取
及我諸祖父一一稱不朽積書至於今頗亦倣二酉
終日東高閣真愧明德後我父遣使來爲汝延師友
汝年已十餘臥起未離母得無姑息愛從旁掣其肘
復恐操汝急令汝意不受無爲治甫田徒滋稂與莠
無爲守糟粕取笑斲輪手幼志不棄捐成德於何有

吾已慙卿長知汝難兄否蓄德常苦薄用物常苦厚
生平不在多常恐爲人右勉汝弓與冶吾將問南畝

悲小陸

敬承子也失母養於余家踰年而殤

阿戎何了了顏色若振素鬱鬱晚中蘭零落一朝露
憶昔保持汝實以同袍故而翁吾兄弟惜汝幼失哺
爾來一載餘依依孺子慕得無視汝踈或爲藥所誤
汝生實相憐汝死疑相負憶汝初學語憶汝初行步
當其委頓時意猶再三顧萬物各有歸彭殤亦旦暮
藏環卽猶在隔世知何處

送張伯任都諫閱視固原

壯士常慷慨懦夫多局促男兒志萬里取別無躑躅
念從去年秋虜騎公南牧關門日以開胡行一何速
鼓聲鬱不發將士併殺戮莽莽洮河間係虜相隨屬
朝爲漢邊民暮爲吳地僕生者長不歸死者填谿谷
氛祲高踰隴聲勢遠窺蜀 至尊日憂勞臣子幸不
辱大臣親行邊主將新分竹比聞捷書來破虜河湟
曲貌貅氣始振豺狼怒猶蓄古來忌小勝兵事多反
覆凱歌未盈耳瘡痍尚在目軍有三日糧民無五月
穀中原疲轉輸吾意憂心腹 天子命近臣分道臨
荒服茲行實特簡何以效芹曝君看和親事利害如

轉轂卽今邊釁開安知不爲福要挾伐虜謀掎角聯
番族朝議省牽制文法罷羈束匈奴斷右臂漢將窺
左足豈無金城畧當如賈生哭國耻猶未雪長歌仍
擊筑

送鍾淑濂給諫閱視上谷

晨發青瑣闈暮出居庸道長風吹大漠萬里白浩浩
維時上谷塞未有匈奴擾廟畧屈羣策邊事藉三表
金繒歲出塞玄黃日在阜我寧求宛馬虜遂厭吳編
豈不練士卒豈不築城堡甲冑不禦冬樵蘇難宿飽
尖丁及養馬飲泣無昏曉請觀郭西田頗亦宜秔稻

幕府鋪如雲私田跡如掃胡雛豈舅甥漢女爲妻嫂
嫁女與漢人不如與胡好胡人饒賜予漢人色枯槁
古來限華夷爲禁苦不蚤關西頃瀕洞朝議思征討
王師久不出此事難草草蜂虿亦有毒長木無不標
漢過固不先虜情信難保武事有聲容邊吏工文藻
羣飛高刺天兩目視衆鳥簡書伊可畏官事未易了
之子匡世姿風采實矯矯歸來報 明主一一陳所
抱如有英雄人無使行間老

壬辰書事贈別鍾淑濂張伯任

世事亦何常慘舒遞相盪今日非昨日回首一惆悵

聖人久在宥君子始用壯漫同賈生哭實恃漢文
量日月豈不照雷霆未敢抗其日風塵昏黃雲自飛
颺侍臣盡改服緹騎紛持杖矯矯山陰公尺牘還內
降庭蓄留侯策 帝厭王陵鱉赤舄將去國白麻別
命相省垣及選部一時盡屏放就中誰最賢鍾張九
侷儻兩生軀幹小氣欲排巒嶂新從上谷來膽落臨
邊將豺狼盡已屏藜藿誰敢傷古來直節士大半投
炎瘴 至尊多優容忍使居一障視汝舌尚在幸汝
身無恙莫忘國士遇寧同庶人謫所惜正士去滿朝
氣凋喪從茲天廐馬靜立含元仗居然言路塞兼虞

禍機釀傳言半疑信蓄意多觀望稽首辭九廟尚欲
徼靈貺國本苟不搖寧使臣言妄謬予非諍臣執經
侍帷帳吏隱類方朔諫說慕袁盎威顏尚不接肝膽
終難諒知無匡世資三山行將訪

今昔行送別嘉猷寄汝培

昔我同袍友講德集鴻都並坐監廣庭聯鑣塞長衢
結交盡時才意氣如友于慷慨語相盡形跡安能拘
相見不束帶披衣及前除斗酒聊斟酌豐儉隨中厨
豈不或疎脫亦自見真吾意趣有所極夢寤亦同符
世路苦多岐風波忽相踰今日輦轂下落落四人俱

北海集 卷一
有時相過從無復向歡娛豈再堪遠別送子城南隅
子實秉高尚雅意在江湖理色尚不辱羅網寧復虞
子歸已十年子來二載餘故鄉一何親故人一何疎
去年當此時陸生將首途猶能設長筵彌日相歡呼
時與二張輩談笑歌烏烏今日別離色益覺形影孤
子去天際鴻我留水中鳧終愧張季鷹秋風思尊鱸
扁舟到廣陵應過李生廬李生自賢豪磊落稱丈夫
千仞忽輕彈傷此明月珠寶玉雖在匣終不掩其瑜
萬事如浮雲相望在懸弧兩生話夙昔當亦念我無
昔如墳與箎今如秦與胡人生寄一世忽若隙中駒

離者未必合來者行當徂惟有崇令德可以爲楷模
官亦不足戀名亦不足圖送子涉長道余亦將乘桴

世用索五十詩久未有以應也感時念別言詠

斯章併寄直卿伯楨

元化一何速汝年遂半百余最小弱弟頭顱亦已白
身世忽欲老日月彌堪惜往時階下樹歷落數十尺
以茲生感歎豈更堪離析憶昔入詞林及汝共朝夕
歡言如醇酒終不廢藥石中夜尚杯酌盛夏或袒裼
驚心問疾病握手論肝膈一朝忽分携萬事俱陳迹
南浦送客處儼然遽爲客往時我送人衣冠竟長席

今日君送我雙騎長安陌昔如滿樹花萬點臨階赤
今如一片葉萬里隨流碧歡敢望當年別亦非疇昔
音徽雖已遠往事頗歷歷曾公陟宮端王郎爲冑伯
勲業當及時努力相鞭策垂天憶大鵬避風感六鷁
出處不同行意固各有適寄言鳳池侶無羨林間翮

待命長白答鍾淑濂

別日常苦賒會日常苦稀中年別親友惻惻心多違
蕭條官署靜白日關雙扉眷我同心人百里遙相睎
新詩忽見遺渺若聞音徽開緘動顏色讀罷沾裳衣
世路頗清泰之子尚採薇腐鼠嚇鳳雛將貽漆園譏

仰瞻鴻雁行凌風西北飛西北有浮雲及汝且同歸

送薛中孺叅楚藩兼懷李景曾給諫

論交亦何常所貴心相知不因臭味合寧恨踪跡離
念子特達士襟抱常平夷大采不緣飾直木無附枝
吐詞何惘欵論行非欵寄以此知爾才足爲雅士規
庶幾明堂器豈曰桃李私言從青瑣班往涖楚水湄
先皇龍興地根本如京師拊循湯沐邑展謁園陵
儀豈必思闕庭忽如侍階墀從來天下足頗憂湖南
饑三楚多剽輕游俠爲盜資丈夫策高足千里蹇朱
帷不能屏貪墨何以憂瘡痍君行過武昌李生今何

其雷霆昔獨處慷慨陳危詞所賴 明主恩尚得安
茅茨仕止各有行心跡兩無違顧我念良友會合未
有期成行不厭早歷官不厭遲我遂佐建禮汝亦叅
藩維顧影自驚慚紫綬何歲蕤但知受恩日未知報
稱時持子血誠心中外皆所宜勉旃日新德以慰長
相思

喜孝與至賦贈

上林雖有樹不若故鄉蘭新知雖云樂不若故人歡
聞子足至門當饋未及餐握手語千古寧問暄與寒
揮塵若風雨未竟復更端語多或錯亂亦自出肺肝

秉燭兩相顧且笑且復歎及汝皆壯齡鬢髮忽已殘
丈夫逾中歲始知世事難汝猶未雄飛吾仕久曠官
生平獨往意耿耿未能安王貢豈不偉要非我所觀
人生許與分豈在綬與冠取筑爲子擊取琴爲子彈
一歌先齊風大海揚波瀾

七言古詩

燕然行

石粼粼草斑斑邊城五月如秋寒渺渺平沙幾千里
天風吹暗燕然山燕然山下臨大虜旁有兩人相對
語握手長歎淚如雨一人自言出門時牀頭妻子牽

北漢集 卷一
衣啼桁上無襦釜無糜君今早出何時歸且復搵淚
一慰之投劔仰天自歎歛朝役鎮城南莫抵鎮城下
聞說派尖丁復道散夷馬已知饑寒棄原野倉皇骨
肉忍相舍一人欲語還囁嚅回頭看有行人無一從
互市不備胡但備將軍營內呼營內呼何時已君亦
大從容復欲念妻子奔走無小休何暇問生死中夜
歸來且自喜寧知明日復爾爾丈夫生死會有時恨
不一死驕胡壘倉卒有語難具陳不敢久立當通津
夜來同望關山月應照關前灑淚人

送二舅之官寄懷伯舅

送舅氏燕山陽行當別復徬徨問客程幾千里吳越
南隔江水天之涯從此始酌君酒問君道過洛陽歷
酸棗見伯舅問安好伯舅去音問少別小舅復草草
憶故鄉臨小圃對修竹坐茂樹我非客舅非主陳土
風齊與曾舅作歌我起舞今其何在汴之滸五馬翩
翩帶長組動見觀瞻誰爲伍我亦寂寥靡與語客游
雖好非吾土最關情在何許一郡槐花冷秋雨

結交行呈楊公亮時公亮止酒

寒不作堂上燕饑不作韝上鷹韝上威稜豈不峻一
飽卽掣非人情親極難爲疎貴極難爲賤長平未罷

東海集 卷一 三頁六
賓客去何必貴賤交情見灌夫雖驕亦自雄江州終
能立異同衛客談劒如多輟恐以此術用之我世事
悠悠安足論豪飲高歌無不可君不見步兵厨君不
見濬冲壚長安車馬夾道趨雲雨翻覆無時無君今
不醉胡爲乎

題沈翁畫竹

何人寫此青琅玕滿堂爽颯生秋寒居然坐我三徑
下數莖不動風珊珊栢溪先生隱於酒戲拈秃筆如
揮帚一幅淋漓竹亦醉醉竹合與先生友蠹蠹三株
狀殊絕迥若蒼虬立烟雪別有一枝秀且長青鸞整

翩從風翔葛陂化龍去已久至今屏障生輝光我觀
此圖懷耿耿墨花亂落團圞影素節偏宜君子堂虛
中獨立尚書省尚書華省鳳池隅新長孫枝引鳳雛
夔龍禮樂方大備伶倫之管公所須此君何可一日
無

泰山歌送盧東麓

歌泰山泰山何崔嵬出入日月興雲雷去天不知幾
百里西望河如帶東望扶桑海一杯爲問主者誰云
是天帝孫闢日觀開天門鳧繹龜蒙出其下儼若羣
后朝至尊左執鬼中右殤宮前後列缺與豐隆何人

排闥忽大叫當關虎豹森如叢盧生落落奇男子直
批龍鱗蹈虎尾纖壤何能增秦岱杞國憂天徒爲爾
百金之子不騎衡立仗之馬何當鳴高名雖如山要
非心所營臣死且不避况乃身外千秋名嗟嗟盧生
逢 聖主不逢 聖主無死所封禪終羞學茂陵
踟躕自合思梁甫我歌泰山以送汝君不見楚國孤臣
浮沅湘流離九死歌東皇

雙林寺歌

長安春風能幾許陣陣化作秋來雨蒼狗白衣那可
辨古今榮瘁寧堪數君不見玄明宮君不見雙林寺

雙林寺主跡如掃路人猶說繁華事憶昔金貂近帝
樞轉日回天傾上都九列有時關進退五侯無敢同
馳驅縱橫五鹿客交結霍家奴城中甲第連白虎城
外浮圖下赤烏浮圖矯矯凌雲際乘豹駝狸鬪神異
天中畫棟盤龍螭階下豐碑蹲鼻鼻 天子親爲降
勅書宰臣不惜書名字布金刻玉神亦勞釁血塗膏
鬼所忌從來執權如抱虎黃鉞一下無處所半夜雷
霆飛赤霄百萬金錢歸少府罪厚難徼帝釋靈譴輕
未霽君王怒大第深沈別有人野寺淒涼已無主試
看今日蓬與蒿試看舊日石與牢豪華意氣竟何在

寂寞樓臺空復高黃金臺前車已覆黃金塢中滿已
樸何處流人泣向隅何人貴近欣當軸一歲花開一
度春一年世事一回新惟有寺前松柏樹年年長對
往來人

送伯楨待御之川中憲副

間何闊逢諸葛行且止避御史御史今年三十幾豸
繡翩翩帶金紫 聖主真憂萬里外使君建節三巴
裏刑天舞干亦自豪精衛填海空復勞黃河懸水三
十仞呼風亂度難容舠嗟嗟王郎汝何往古來得失
如反掌長安大路多摧輪况乃蜀道青冥上蜀道之

難難於天不如歸問桑麻田振衣獨上三峯顛塵埃
野馬何茫然君不見雁門菟郡伊與鹿南陽畫諾亦
見逐世間萬事誰能卜汝爲遠臣恩已足

邀同館諸丈餞別公亮伯楨

長安三月春風號鴻雁嗷嗷求其曹天涯乃復別同
袍相將小坐傾濁醪楊生掀髯氣益豪酒權三尺汝
所操余子大嚼如吸濤張君不飲空持螯沈郎杯酒
多逋逃敬承雄辨聲嘈嘈伯楨耳熱看佩刀浮沉萬
態皆鴻毛誰能俯仰如桔槔但當痛飲讀離騷且復
啜醪哺其糟擊筑悲歌醉益高悲歌未斷天欲曙月

明斜挂城頭樹今日相逢且盡歡明日相思不知處

古意

南爲鷓北爲鷹側目下視烟光凝梁間燕雀何足問
鵬雛不敢當風稜一夜春風春草綠縱化爲鳩猶帶
目九霄翮鍛氣不折獨歛霜拳向空谷炙手自熱君
自寒批鱗容易騎虎難山中猛虎猶自可江上短狐
射殺我

桃花嶺歌

無棣城邊春欲暮臥龍岡上花如霧年年醉徹武陵
烟至今記得桃源路桃源徧地桃花水翠屏高倚層

城起乍可餘姿點綠蕪肯將浮艷誇穠李始看一徑
盤空曲漸入千枝散朝旭滿樹殘霞爛不收一天香
雨飛紅玉白雲深鎖楊子居青山自愛陶公廬平蕪
十里閒看鳥春水一竿不羨魚大隱何須分出處賞
心豈必長林莽桃李濃滋華省陰公門自是韶華主
綏山一顆憶仙家絕勝河陽萬樹花歲歲願公懸水
鏡長將秋實代春華

新吾大叅遺我古鏡因作古鏡歌贈之

古鏡不知何年冶得之洛陽古城下背面隱隱雙盤
龍土花半露青芙蓉獨歛光華抱耿耿何不拂拭照

人影此物曾經對古人此時不用空委塵願公持照
流亡屋亦自不減光明燭

蟠松歌寄公亮

齋前松樹不盈尺亭亭車蓋層雲似虬枝婉婉世所
喜嗟爾勁節乃如此豈無凌霄姿一旦成繞指雷雨
力排未敢爭龍蛇將螫何當起展轉空向人詰曲誰
相理直木從來忌先伐曲榦猶存愈於死問君曲直
安可爲大道委蛇誰則知請君看取歲寒色猶自青
青似舊時

觀燈篇

帝握千秋曆天開萬國歡鶯花周正月燈火漢長安
長安正月旋璣正萬戶陽春布天令新歲風光屬上
元中原物力方全盛五都萬寶集燕臺航海梯山人
貢迴白環銀甕殊方至翡翠明珠萬里來薄暮千門
凝瑞靄當天片月流光彩十二樓臺天不夜三千世
界春如海萬歲山前望翠華九光燈裏簇明霞六宮
盡罷魚龍戲千炬爭開菡萏花六宮千炬紛相似星
橋直接銀河起赤帝真乘火德符玉皇端拱紅雲裏
燈烟散入五侯家炊金饌玉鬪驕奢桂燼蘭膏九微
火珠簾繡幌七香車長安少年喜賓客馳騫東城復

北漢集 卷一
南陌百萬縱博輸不辭十千沽酒貧何惜夜深縱酒
復徵歌歸路曾無醉尉訶六街明月吹笙管十里香
風散綺羅綺羅笙管春如繡窮簷蔀屋寒如舊誰家
朝突靜無烟誰家夜色明於晝夜夜都城望月新年
年郡國告災頻願將 聖主光明燭並照冰天桂海
人

文筆峯

誰家中書君矗立百餘尺石髮籠葱散彩毫墨花亂
落芙蓉碧銅標華表若爲扶去天一握秋雲孤願將
學士如椽筆爲寫君王赤縣圖

金雞山

天上玉衡星墮地化爲山鳥道難分青嶂杪雞聲長
在白雲間白雲青嶂扶桑路高冠翠羽藏烟霧一夜
三號天下春主人正在雞棲樹

馬鞍山

天馬蒲稍去已久茲山乃作馬鞍狀萬里雄風生顧
盼始知身在層巒上百尺權奇勢若盤紅塵不動玉
珂寒欲知金馬山頭色請向銅龍署裏看

流水橋

一曲澄泓流水碧平林斜對山橋夕何必二仲始同

北海集 卷一 三十五
調但能來往非凡客與客乘春春水涯春風春雨生
連漪世間萬態皆有極流水悠悠無盡時

桑乾歌

桑乾之水何漫漫天風五月波濤寒驚流撼地地欲
動蛟螭不敢凌飛湍遠望只疑銀河懸虹蜺倒挂下
飲泉近看更似蒼龍蟠玉鱗金甲相飛翻北控沙漠
東入關千山不得障回瀾百折不辭到海難我來欲
渡桑乾水朝浪并州暮千里區區涇渭何足比烈士
壯心亦如此投君兵甲爲君洗流盡六合無泥滓一
望烽烟常不起誰挽此河報 天子

送董巢雄比部謫官之上谷

君王神武被遐荒苑西校射臨長楊內殿親軍天廐
馬三千貂錦黃金裝董君叩 閣氣磊落風霜尺疏
紛相薄大內爲停龍虎軍仙郎暫謫芙蓉幕迢遙上
谷接燕然窮邊一鎮稱孤懸塞上河山通大漠轅門
戈戟擁胡天胡天大漠并幽地安邊自合多長計破
虜誰論一戰功和戎未必千秋利一官落落亦王程
壯志何妨更請纓但願 君王長耀德孤臣不敢厭
談兵

壽沈節婦

碩人粲粲名家子結紉蘭蕙被芳芷束髮來登君子
堂事君誓擬同終始一朝奄忽分鴛鴦九地何難辱
螻螳堂上尊章膝下孤百世蒸嘗欲誰恃無那含情
念存沒幾番枝淚權生死洛陽士女競春華妾心清
擬漳河水燈火杼機聊自供霜天形影寒相倚朝哭
穆伯暮文伯高天蒼茫亂雲駛笳笳孫子復重孤蕭
蕭門徑猶三徙三十年來兩爲命銷盡妝臺舊簪珥
帝獎孤貞下 璽書 詔賜高年介繁祉孫枝奕
奕凌雲姿驤首天衢稱國士皂囊霜簡殿中班白筆
風稜柱下史南嶽夫人獻壽迴西臺使者稱觴起晴

瞻洛下曉雲白瑞靄夷山真氣紫古今奇節亦何限
潔身未必能存祀趙氏家臣烈丈夫大義立孤差可
擬嗚呼死事與成事千秋臣節亦如此

同直卿世用飲敬承書舍

將進酒歌慷慨同袍兄弟幾人在丈夫片語吐肝膽
况我與汝非傾蓋請思前日江與湖今日宴會當歡
娛亂拋三雅呼五白酒態故事吾狂奴有時正襟忽
危坐杞人憂天心力破阮籍爛醉爲身謀吾儕未敢
希高臥昨朝新自建章回相對且復愁顏開 皇帝
陛下三千萬臣等日日傾金杯醉二參飲八斗金章

北海集 卷一
朱紱吾何有但願無事長相守諸君異日記憶否有
如此燈與此酒

和余雲衢歌

余雲衢汝今欲歸何爲乎汝旣不能西出關東乘桴
男兒墮地志四海何必區區思枋榆憶昔與汝直史
館待詔石渠坐日晡望見前輩執經入細旃廣厦相
都俞自從前年偶濫竽衣冠無復殿中趨昨日受賜
北闕下及汝汗背皆沾濡旣無壯斷與老謀不能擊
倭兼擊胡憤來亦思請纓去第恐造次非良圖仗下
馬水中鳧人生仕宦乃如此安用簪組榮吾軀余雲

衢思葺鱸海氛甚惡雲模糊大將徵兵臨河渠徵輸
百道軍所須荒村雞犬愁追呼 朝廷天下始多事
汝在田野寧歡娛余昔與汝同出入汝且爲我留須
與明年青春好作伴與汝矯翮投菰蒲東山豈敢希
高臥北風聊可賦同車逝將去復踟躕 主恩未報
將安如殷憂天將悟 聖主或者一謁承明廬北辰
有光少海闊我輩可以安江湖汝今欲歸何爲乎

結交行懷于穀峯年伯兼訊侯將軍

嗚呼結交難結心無論廊廟及山林下里浮沉世事
淺中朝出入人情深二十年來與公厚倒屣傾筐無

北海集 卷一
不有疊疊清談曲席前沉沉夜酌疎鐘後有時聯騎
遊郊衢誰相從者葛與朱侯生亦自有俠骨酒酣擊
缶歌嗚嗚遠從京華望丘壑迥如樊笈思寥闊一朝
客散長安却千林萬點從風落朱君竄葛君死貴陽
老將亦歸里齊魯天青兩少微並驅中原與公耳尚
書烏學士魚歲云暮矣公何如安得朝廷新事少漸
看社稷舊人疎公別長安能幾載故侶心期復誰在
里中何人與同調公近岱宗僕近海丈夫豈必長垂
紳羨公有筆如獲麟城邊黃石應知我海上青山不
負人問余山中何所有冶湖一曲竹十畝有山有水

復有酒公能命駕一來否

去婦歎送別陳南濱侍御

戚戚復戚戚去婦長太息欲去難爲別後心不去寧
堪眼前擲不須逐去婦婦去何須逐昨日尊章偶不
歡今朝娣姒笑相目等是君家婦妾命偏難住風雨
何淒淒不見嫁時路郎君如浮雲雲暗復中開賤妾
如流水水去何當回水流東到海千里始一曲妾行
無所歸一步一躑躅留妾身上襦忍名曰合歡携妾
機中絲念君衣裳單去婦行色何草草人情反覆誰
能保束縕虛勞鄰母問織縑自有新人好新人貌舊

人心妾命自薄君恩深君恩深妾何止休言嫁婦不出里倘君別後能相理與君同生亦同死

題尹中丞栩栩園

中丞別苑臨江渚澄江如練烟如縷萬樹籠葱一徑開不見人行聽人語北連雲夢澤雄風餘伯國南望鸚鵡洲綠水涵清秋漢水遙通子真谷秦人錯擬桃源曲孤亭坐對白雲生不知遠山與近竹七松處士翠成圍五柳先生綠掩扉扁舟競渡夕陽渡溪上歸人何處歸欲問主人何爲者朱旗白羽轅門下新從海國靜鯨鯢直挽天河洗兵馬吁嗟乎丈夫豈必老

羊裘烏臺亦自如丹丘當其意適神與遊蝴蝶可使爲莊周不然肝膽分爾汝夢中蕉鹿竟誰是濠上惠子非莊生濠下遊魚非惠子人樂不關魚魚樂非關水觀魚夢蝶兩悠悠眼底浮雲盡如此我亦生平愛寥闔焚却銀魚管一壑齊楚主賓何必問鸚笑鵬飛各有託十畝青山七尺身出處寧爲世法縛春來蝴蝶飛滿園與君非夢還非覺

馮琢庵先生北海集卷一

馮琢庵先生北海集卷二

齊郡馮琦用韞著

詩

五言律

送二伯二首

送見堯業師南還五首

過業師舊居

和崔仲素題業師舊居

夜渡桑乾

渡易水

北溪集
卷二
別業樓居三首

秋夜

冶源

韋莊與直卿世用分韻三首

觀暨侍中園二首

三月廿八日同諸丈集黃侍中園亭看花三首

可大邀于宮諭飲摩訶庵紀事四首

登慈壽寺閣二首

遊摩訶庵贈靜堂上人

宿法藏庵聽琴贈無絃上人

重遊黃錦衣園亭懷可大二首

閏月九日寄呈家君二首

婉兒怨戲柬敬承五首

魏懋忠雨後見訪

夜過懋忠

同敬卿過懋忠日者魏子與坐

同世用以占二太史飲懋忠第

立秋前一日載酒過懋忠

送懋忠年丈使秦三首

唐仁卿同餞懋忠二首

同莊中熙王敬卿飲城河堤上二首

偕敬承小坐城河堤上二首

秋夜偶成示舍弟二首

寄李太僕五首

送楊楚亭太史王柱山侍御外轉藩臬四首

送公亮出叅閩藩三首

釣臺二首

送余君房學憲之關中

湖上

過翠華巖

山下別于宮諭年伯

十八夜同可大過懋忠見其七子

挽于航隱先生三首

雪中同敬承小酌

除夕

送蕭玄圃太史 冊封淮藩將粵西省觀

送鄭大司馬經畧西邊六首

與嘉猷同卧病卜鄰不果以詩見示用韻奉答

送曾健齋光祿閱視雲中二首

送周尚寶閱邊

與實甫曉步堤上

葉給諫邀同實甫敬承飲隆恩觀南園

晚酌堤上

同館諸兄共集小園

過韋公寺

郝園看海棠

飲韋公寺園

送顧實甫 予告南歸四首

送王大理兼憲職閱視延綏三首

聞寧夏邊報六首

讀楊太宰詩有感二首

送莊冲虛太史 册封靖江王二首

送周尚寶以寧夏事謫潮陽尉三首

送崔仲素少府解官東歸四首

五言律詩

送二伯二首

承歡能幾日分袂卽前林
易洒征人淚難爲遊子心
孤峯晴望遠匹馬雪行深
不盡停雲意長歌動越吟

二

骨肉天涯別河橋曙色微
子兼臣獨苦伯與父同歸
遠道愁加飯涼風想授衣
眼看秋欲暮只恐鴈來稀

送見堯業師南還五首

避地憐張儉傳經憶馬融
孤蹤連夜雨短翮怯秋風
幸免淹梁獄寧悲失楚弓
寄書愁遠道斟酌付征鴻

二

乍出驚初定孤惛不安月隨疲馬度霜落敝裘寒
往事堪流涕新知付永嘆風塵能自保吾敢問彈冠

三

顧影誰當繼臨風獨愴神夢辭燕市月心折帝京塵
天地愁無色雲山氣自春壯圖悵已矣揮淚復何陳

四

灞水遙傷別燕山獨送行彈珠元自誤抱玉竟誰明
撫已虛疑夢逢人怯問名報書稀不到霑洒望神京

五

別離無復道天地意如何愁入征雲暮心驚飛鳥過
憂來千慮少歸去一身多行止皆無策相寬一放歌

過業師舊居

寂寂重樓上蕭蕭半榻書鳥啼春院靜燕度曉梁虛
塵冷琴聲斷風微簾影疎凭欄無限恨不爲嘆離居

和崔仲素題業師舊居二首

客裏移居日天涯別恨深九霄鸞翮鍛千里鴈書沉
日轉湘簾影雲流芝砌陰那堪披絳帳寂寞自登臨

二

去矣今何往蕭然歸故鄉一身還落落六合自茫茫

北海集
卷二
淚洒雲山暮愁隨道路長向來生死事不敢問穹蒼
夜渡桑乾

迢遞關山路桑乾控上游濤從雲外落月向浪中浮
夜火人爭渡天風水暗流歸期知不遠只是憶并州

渡易水

駿骨何年事黃金尚此臺燕陵空北望易水自東來
百里賢良聚千秋伯業開如何別壯士獨奏羽歌哀

別業樓居三首

秋色正無際登樓興渺然虛空通野氣小徑入山烟
鳥影松蘿外人家桑柘邊居懷上世獨誦白雲篇

二

只在重樓上翛然隔世氛簾飛三徑雨窻落萬山雲
日暮牛羊入天清鴻鴈聞誰知楊子宅不草太玄文

三

西風下木葉寒色莽蕭蕭白屋容疎放青山慰寂寥
鄰翁閒策杖野水漫穿橋苦乏匡時畧躬耕荅聖朝

秋夜

天宇澄秋序涼風夜色微爲憐明月好不掩白雲扉
遠火孤村徑鄰燈寒女機砧聲欲愁絕幾處賦無衣

冶源

湖山一以眺雲水澹相和小設青菰飯微醺白苧歌
林稀人影亂地僻鳥聲多久許尋初服池中有芰荷
韋莊與直卿世用分韻三首

韋曲名園好習池勝事繁午風披蕙帶秋色上苔痕
密樹雲成幄踈籬水繞門不煩除客徑吾欲藉蘭蓀

二

此地堪乘興况偕心所歡秋歸山徑易塵到水亭難
細草偏縈屐低枝屢礙冠野雲侵坐側衣袂欲生寒

三

半畝松陰合一庭草色斑賞心花共醉幽意鳥相關

鍾磬水邊寺烟霞天外山良遊同二仲薄暮不知還

觀暨侍中園二首

常侍菟裘地停車試一過草淒幽砌冷雲白遠山多
過午移花影因風聽鳥歌小塘春水滿猶是舊恩波

二

玄圃長標勝朱華紛未希何人披草徑獨鶴款松扉
花氣晴薰佩蘿烟翠染衣夕陽歸騎晚清興尚依依
三月廿八日同龍池鳳池邀于年伯朱年文集
黃侍中園亭看花三首

甲第春多少雕闌滿樹華共携千日酒來醉五侯家

露浥緋衣潤風含翠羽斜非無葵藿意不貢洛陽花

二

何地無芳草良遊及曉風塵分三徑外春盡百花中
着屐衝殘絮鈎簾惜落紅幽情殊未極移酌小園東

三

自託忘年契邀從上客歡鳥知來度曲花與共憑欄
取醉吾徒易求工世路難同心何以喻九畹正滋蘭

可大同邀于宮諭飲摩訶庵南園步至釣魚臺

夜眺還宿法藏庵紀事四首

如是招提境全消大地塵空林初過雨小苑尚餘春

水竹宜歌鳥烟霞媚酒人不須移坐榻吾自有花裙

二

蒼烟望不斷幽徑一何深未盡寰中賞其如塵外心
浮雲千樹色殘日半山陰漸與祇林遠猶聞清梵音

三

共有濠梁興壺觴夜自携野雲侵坐冷春月向人低
烟合遠山暝天連蒼樹齊仙源一水隔無路覓前蹊

四

萬籟晚方寂疎鍾隔院聞中宵猶醉月下榻欲棲雲
夜色曇花影經聲貝葉文因君談小品夢覺已全分

登慈壽寺閣二首

選地開靈境乘高謁梵筵樓標香象伏塔影玉龍懸
晻曖九陵樹霏微萬井烟滿衣香不散知是近諸天

二

香閣青霄外登臨一望遙三天開壯麗千嶂借岩堯
雲葉當窻度空花拂檻飄大乘如可悟幾欲問參寥
遊摩訶庵贈靜堂上人

地有金沙布庭看寶樹滋偶從玄度至因見惠休詩
風細松杉靜烟深薜荔垂支公延坐禮共許白雲期
宿法藏庵聽琴贈無絃上人

妙諦開龍藏清談過虎溪更從雙樹杪借我一枝棲
法界心常淨名琴手自携曲終人境寂殘月竹房西

重遊黃錦衣園亭懷朱可大三首

聯轡遊何處開尊復此亭名花妃子醉狂客次公醒
苔蘚封春徑藤蘿繡石屏所思猶在遠吾意折芳馨

二

蔬圃曾遊處柴關靜自扃裘羊無故侶鳥雀自空庭
小坐看山醉微醺照水醒桔槔聲自好莫遣漢陰聽

三

蒲院清陰合雙槐抱小亭樹搖杯影綠草映屐痕青

花鳥閒同醉風塵笑獨醒年年遊此地不負草堂靈

閏月九日寄呈家君二首

再見重陽節韶華去復回祇緣懷陟岵不敢更登臺
止酒萸空存無書鴈獨來故園今日菊寂寞向誰開

二

爲計郵程遠今朝濟水濱園荒陶令菊俸積漢庭薪
節序悲遊子秋風度遠臣孤村花自發送酒竟何人

婉兒怨戲柬敬承五首

昨日開金屋君恩別處新難將織錦意去比浣紗人
只自憐中婦誰當念下陳嫁郎何太早不敢怨前薪

二

今夕是何夕雙星已渡河人間悲織素天上悵停梭
春色簾櫳隔秋風枕席多恐君疑妾妬未敢問修蛾

三

見說新人好君心豈舊歡離愁隨月滿信誓近秋寒
縑素寧堪問茗華半已殘粧成郎未起寂寞鏡中看

四

故劍誰相問前魚祇自悲轉因辭寵日私憶合歡時
隔牖歌桃葉因風泣柳枝啼痕還自掩羞遣侍兒知

五

不寐驚秋早無言坐夜分已拚成棄妾未忍便忘君
形影窻前月悲歡夢裏雲如能念疇昔看取舊湘裙
魏懋忠雨後見訪

花氣雨相和仙郎躡屐過空齋邀夜月高詠對星河
憶舊懽方洽忘形語漸多豫愁良會少秋色入驪歌

夜過懋忠

偶談二華之勝故未句及之

但陳孺子榻不待主人留露下高雲薄天空澹月流
襟期予及汝風物夏兼秋莫羨三峯勝終當賦五遊
同敬卿過懋忠日者魏子與坐

魏大才名久王猷發興奇只愁月色淺不問酒行遲

移席避清露披襟納晚颺莫談季主卜吾道未須疑

同世用以占二太史飲魏光祿懋忠第

不醉大官酒其如良會何人占星下聚月向雨餘多
夜色消銀燭流雲濕絳河且携餘興去明日復來過
立秋前一日載酒過懋忠

今日良宴會情深更起愁追歡還卜夜戀別不禁秋
螢火含風冷燈花近雨收休言尊酒盡歸及細君謀
送懋忠年丈使秦三首

相知苦不早相送已沾襟雨後初秋色燈前欲別心
青山經洛遠紫氣入關深良會知何日瑤華好嗣音

二
星使入秦州飛旌渭水頭露華雙掌曙雨色二陵秋
對酒思同舍看山悵獨遊漢家三輔地行矣慎咨謀

三

十載風塵裏相看知己希一尊烟雨外復與故人違
官况迎秋冷鄉心與鴈歸那堪頻送客去問老萊衣

唐仁卿同餞懋忠二首

時仁卿亦在告

良會只今日驪歌亦太頻如何客與主俱是遠遊人
蓮岳三峯曙梅花五嶺春涼飈昨夜發時憶故園尊

二

岐路論交日清朝抗疏人飛騰龍作友來去鴈爲臣
嶺海雲開粵關山月照秦丈夫多意氣萬里是比隣

同莊中熙王敬卿飲城河堤上二首

莊惠堪同調濠梁坐不歸蓬蒿侵小徑荷芰問初衣
蛩語臨秋急人踪隔岸稀莫將軒冕意驚起鷺鷗飛

二

會心不在遠已似出塵寰靜倚水邊樹遙看郭外山
樓陰雙徑直潭影片鷗閑何限沉冥意悠然託近關
借敬承小坐城河堤上二首

綠樹斜連郭清流曲抱城野人歌刈楚游客坐斑荆

水澹秋同色山橫氣欲平風塵還爾醉共濯此長纓

二

不柰聯歸騎依依聽暮蟬客心芳草外人影夕陽邊
城郭銷往事流波感逝年回看行樂處獨鳥下蒼烟

秋夜偶成示舍弟二首

客子知秋早鄉心向月看鶴鴒悲共語烏鵲耿難安
宦海三珠樹空山九畹蘭弓裘全付汝久意在漁竿

二

一院蛩聲合空堦鴈影過疎燈人不寐涼露夜如何
逸思秋來減歸心病裏多長安今夕月應照舊烟蘿

寄李太僕五首

自是彈珠誤休嗟按劍頻蛾眉原易妬龍性復難馴
事去無知已愁來憶古人長安舊父老猶自說埋輪

二

日月紆宸眷風霜起諫章一時歡御李百發盡穿楊
道路青驄馬烟霞薜荔裳主恩真自厚肯使到沅湘

三

世議隨興廢君恩有是非可憐京洛色猶在逐臣衣
萬態終碁局浮生且釣磯寄言寥闊士早息漢陰機

四

慷慨終何補憑陵亦自豪一從持異議誰復問同袍
報主終蛇足難兄有鳳毛風波君自慎莫看廣陵濤

五

意氣揚雄在交情陸賈真艱難辭諍友涕淚送孤臣
海內幾知已天涯常畏人今宵逐客夢應傍屬車塵

送楊楚亭太史王柱山侍御外轉閩蜀藩臬四

首

分袂俱千里同袍尚幾人非關勞侍從詎合走風塵
天盡刀州路雲迷劔水津莫辭今夕醉猶對漢宮春

二

縱是雄心減其如傲骨何歸無三徑業去有五噫歌
摘藻才難盡憂時語較多未應隨賀監恐有鏡湖波

三

袞職真無闕遐荒借近臣汲公方去漢王粲欲歸秦
白眼難容汝青山不負人振衣千尺上太華與嶙峋

四

王子應回馭楊生合草玄未須論我貴終不受人憐
悵別仍投轄臨期有贈鞭斷腸南浦鴈雙度薊門烟

送公亮年丈出叅閩藩三首

一出春明外方知道路難詞臣行作吏報主敢論官

何日延津合悲風易水寒天街明夜月寂寞倚舟看

二

攬轡澄閩地分襟雙闕前懷人鴻鴈候馳馬荔支天
詞賦非長策旬宣及盛年遙將萬里夢同向北辰懸

三

會面知何處離心鬱未安身謀元自拙朝議向來寬
才大縱橫易家貧去住難老親堪捧檄造次莫辭官

釣臺二首

翳然林水處便自遠人寰麥隴雙鳧沒松雲獨鶴還
高低春澗柳深淺夕陽山坐憶垂竿叟高蹤未可攀

二

是處堪垂釣誰家常閉關樹多偏近水雲薄更宜山
鳥語扶疎裏人踪杳靄間日斜仍策馬太息野鷗閒
送余君房學憲之關中

文物師前代河山拱上都遠分中禁鳥獨握大秦珠
向日看陽燧連星識湛盧寄言問令尹紫氣入關無
湖上

湖氣亂晴暉深林隱翠微平蕪飛鳥下曲徑行人稀
新雨橫山帶涼風散水衣芙蓉空欲採晨露未全晞

過翠華岩

明湖看欲盡遠寺始聞鐘不識青蓮界芙蓉第幾重
行披三徑草坐對洞門松雲際傳清梵天香落碧峯

山下別于宮諭年伯

塵世關何事飄然去此峯回看青嶂色已足自白雲封
惆悵山前路依微天外鍾大夫歸興早空對數株松

十八夜同可大過懋忠見其七子

共有清尊興連鑣訪魏舒月當元夜後酒是大官餘
一室無塵事諸郎讀父書坐來忘客主隨意步階除

挽于航隱先生詩三首

天意真難問斯人竟陸沉百年生死夢千里弟兄心

遂罷淵明酒空餘子敬琴太玄終不廢異代有知音

二

生事因詩廢雄心對酒長人傳平子賦客避次公狂
一世無同調重泉且異鄉向來行樂處蘿月夜蒼蒼

三

才大終難用名高世所疑蕭條鴻鴈影急難鶴鴒悲
嗟汝藏舟早悔余傾蓋遲楚騷公所好爲誦大招詞

雪中同敬承小酌

是歲始罷煖耳之

竹外雪蕭蕭天涯暮寂寥未成梁苑賦敢望漢宮貂
當饋頻憂國停杯問視朝九衢寒不夜轉覺鳳池遙

除夕

報國當何日辭家又一年薄遊寧足問微尚久茫然
萬事古人後孤燈新歲前明朝開左个假寐待朝天

送蕭玄圃太史册封淮藩將粵西省覲

暫下承明直新驅六傳還王程芳草外親舍白雲間
桂樹淮南邸梅花庾嶺山羨君持漢節光映舞衣斑

送鄭大司馬經畧西邊六首

胡羯終無賴朝廷合有人恭憑七廟畧遠淨九邊塵
忍以遺君父當亡踰老臣從來今款貢不比漢和親

二

暫借尚書舄高臨大將壇五兵屯細柳萬騎威樓蘭
已罷和戎議休言出塞難武功知可奏文法近來寬

三

邊計無終歲戎心已歷年五原通警急四郡久孤懸
胡騎秋鳴鏞材官夜控弦豈無班椽筆一爲勒燕然

四

太白高如許今年大破胡夏卿恢將畧天策借兵符
嘍哨今猶在瘡痍立可呼莫教清海曲仍駐小單于

五

主聖收羣策時危藉異才將星高斗極天語走風雷

倚劔霜花落揮戈日影迴名王應下拜驚喜令公來

六

未拜千秋節真同八月槎將權傾外閫兵力半中華
車騎分諸校梯航自一家伐謀真上畧緩帶淨胡沙
與嘉猷同卧病卜鄰不果以詩見示用韻奉荅
同調仍同病相違動浹旬只餘愁伴客敢望德爲隣
時事嗟今日交情到古人秋風昨夜起那不憶鱸蓴

送曾健齋光祿閱視雲中二首

大漠君方去三雲我舊過遙知新塞月偏傍列卿多
白草飛狐口黃沙拒馬河但教驃騎在莫問郵支和

二

玉門原不閉天馬未曾來草色經春淺笳聲入暮哀
胡兵青海曲漢使白登臺塞上方多事應憐魏尚才

送周尚寶閱邊

五雲辭玉璽千里擁兵符今日看邊畧終年仗廟謨
金城空築塞鐵騎不防胡歸向明光奏窮荒有泣隅
與實甫曉步堤上

河橋春色好清興步相催乍見寒流折方知曲徑迴
終朝高柳映滿樹曉鶯來未測仙源裏桃花開未開
葉給諫邀同實甫敬承飲隆恩觀南園

共是金閨彥來遊羽客家如何近城郭忽已到烟霞
倚檻親啼鳥斑荆惜落花居然在玄圃不必飯胡麻
晚酌堤上

未盡濠梁意聯鑣復再過當歌愁日暮不醉柰春何
芳草連山碧垂楊近水多歸期難自緩留興寄層波
同館諸兄共集小園

惟我金蘭友宜過水竹居春深寒食後人醉海棠初
對局花陰靜憑欄樹影踈時時能命駕敢謂此吾廬
過韋公寺

豈無車馬跡不妨雲樹幽蒼然階下栢對此門前流
花圃遙相待山僧復見留歸驂或可住更與夕陽謀
郝園看海棠

曉日郊園徑紅芳照綠苔客能聯騎至花解向人開
歛態嬌相倚含顰艷不來只疑雙樹色同醉掌中杯
飲韋公寺園

細草雙堤路孤亭一水前林深時見鳥波淺已生蓮
醉卧夕陽下起行芳樹邊臨淵何所羨餘興已忘筌
送顧實甫予告南歸四首

我已風塵久君何予告頻暫辭三殿直却憶五湖春
日下懷明主天涯別故人滄洲何必遠只在帝城闈

二

又作三年別那無十日歡河梁從此去易水爲君寒
病覺宦情薄老知交道難今朝斗酒意來夕夢中看

三

秋風還未至底事促歸裝會共驪歌短愁將帆影長
凌雲好自惜對月莫相忘不淺彈冠意難期是帝鄉

四

故人多病色遊子有歸心荏苒關何事沉吟遂至今
相思愁日暮欲別苦情深爲問南飛鵲何時到上林

送王大理兼憲職閱視延綏三首

欲問貔貅隊仍須獬豸冠臨關卿月迥出塞陣雲寒
整暇軍聲壯驅馳王事難莫將旌節好虛借路人看

二

迢遞延州路風沙古戰場地當左馮翊塞直右賢王
飛將摧驕虜懸軍出大荒那堪分士馬辛苦戍漁陽

三

地擁長城壯山當上郡雄椎牛誰饗士市馬久和戎
苦樂軍中異安危塞上同莫教河隴外獨擅貳師功

聞寧夏邊報六首

不見妖星落還聞羽檄飛廟謨思仗鉞天意在宵

北海集 卷二
衣屈指誅戎首、驚心念禍機。治平何日奏消息、問黃扉。

二

皓首同嬰難、邊臣亦可哀。時危空授命、事去不論才。名豈誅晁錯、魂應抗杜回。故園春已盡、白骨好歸來。

三

大將分旗鼓、中權擁節旄。宵深封事入、日昃主心勞。不見妖氛淨、其如秋氣高。孤城十萬戶、早已下蓬蒿。

四

未戰先行賞、君恩信是多。何時誅僕固、終日憶廉

頗朝士空持橐、邊人自枕戈。爭傳萬里外、詔下西河。

五

欲問盈庭議、惟當決勝才。願呼驃騎將、早破赫連臺。四野胡笳合、孤城羌笛哀。夜深驚起坐、曾否驛書來。

六

遠道傳烽火、高天結陣雲。不愁回紇馬、恐似棘門軍。列鎮兵相仗、連營勢轉分。漢庭占吉語、可得入秋聞。

讀楊太宰詩有感二首

近得尚書信、殷勤問聖躬。愧爲香案吏、未覲建章

北海集 卷二
宮寤寐思 明主安危寄令公 皇儲何日定應待
采芝翁

二

拙宦終無補浮榮空自憐承明難謁帝中夜苦憂天
受賞何顏色蒙恩憶歲年將辭燕市月歸向汶陽田
送莊冲虛太史 册封靖江王二首

爲分桐葉去遠向桂江頭遙想日南國還同關內侯
客程遙度嶺歸計欲經秋珍重三都賦雞林已見求

二

知君忽已久門下見門生多少青雲士皆成白雪名

汝能稱杞梓吾可遂柴荆如過衡陽道相思一寄聲

送周尚寶以寧夏事謫潮陽尉三首

雞肋官仍薄羊腸路轉難可憐秦逐客更遠楚江干
事去空談劔憂來盡指冠潮陽碑尚在寂寞待君看

二

兵亂誅晁錯時危厭禰衡不眠憂國事久念使人驚
聖主終無意孤臣敢自明未須嗟按劔寵辱盡浮名

三

絕塞烽烟動西征將卒驕如何慷慨士遠去聖明朝
隴首春蕭索旄頭夜動搖廟謨能自定謫宦敢辭遙

北海集 卷二
送崔仲素少府解官東歸四首

折柳帝城闈，飛花滿路塵。可憐寒食節，相對倦游人。
宦業貧非病，交情別更親。夜來有歸夢，憑寄故園春。

二

世途那可問，之子掛衣冠。不謂王孫去，仍同范叔寒。
有身成小隱，何物是微官。笑指營平月，三山天外看。

三

今夜長安邸，踈燈話舊遊。明朝潞河畔，片月照寒流。
失色休談虎，忘機且狎鷗。從來故鄉好，原不是并州。

四

微官易去國，久病喜還家。不分青春色，先歸碧海涯。
入山逢羽客，隔水問桃花。欲識真人氣，蓬瀛指落霞。

馮琢庵先生北海集卷二

馮琢庵先生北海集卷三

齊郡馮琦用韞撰

詩

五言律

雨中書懷

七夕敬承邀諸子集董園

次日復邀諸子共集

送敬承掌留院兼懷公亮

聞寧夏平四首

喜公孝與至夜話

送孝與有事晉中

送操江中丞張正之四首

喜仲素至夜話

送仲素歸海上二首

夜中書懷呈海簑二首

吳太華使君買姬

寄珂弟

泛舟送別嘉猷二首

送別嘉猷與直卿世用共坐瀛洲亭

不寐

孝與見訪別後寄詩答四首

雄州道中

登樓二首

懷懋忠中丞二首

大風答世用二首

春雪二首

挽材官黃海嶽二首

送介軒叔南還二首

送母南還書懷呈老父及示少弟四首

宿棲雲閣

仲素違冶湖之約以詩見問賦荅二首

送季韞弟以選貢廷試三首

挽朱鑑塘司寇五首

冶水二首

別業

荅懋忠見懷之作二首

懋忠將行同于田夜坐有作

蔣符卿邀崔仲素及余同遊張大叅園亭二首

城河堤上望月二首

過舊園

同季韞用鳴二弟遊赤澗小園三首

石湖

紫澗瀑水二首

山徑

晚歸

胡使君以雙鶴贈余為賦五言四章

同館中諸兄集張質卿次韻

大祥上冢書懷示弟五首

同季韞用鳴弟遊赤澗菜園二首

同兩弟觀荷花有感

贈交郡司理周公乃翁二首

同曾直卿張泰亨敖嘉猷送余世用歸墓四首

劉少宰及曾朱二宗伯以詩見示次韻二首

大祀齋居書懷呈李太宰二首

端揆堂月下與李太宰共話

冬至祀南郊

題遲竹窻園亭二首

代肖翁有懷戲集古字

歲暮答懋忠

病中二弟至

五言律詩

雨中書懷

未料陰晴事難瞻
日月光捷書邊騎
少氛侵海波長
久雨或妨稼多愁
非望鄉何時乾
后土若爲問
穹蒼
七夕敬承邀諸子集董園時敬承將有留院之命

名園同載酒秋色上人衣喜共雙星會
愁將片月歸世間常苦別天上亦多違
安得填河鵲乘風盡北飛
次日復邀諸子共集

把酒對秋天秋烟淨可憐
夜當牛女後人擬惠莊前

河漢復幾許濠梁遂渺然賓筵休隔日別思恐經年

送敬承掌留院兼懷公亮六首

有美同心侶聯居上院西入朝時並馬憂國屢聞雞
情或機雲似名慚李杜齊預愁明夜月獨影對青藜

二

我未尋初服君先問綵衣孤懷蛩自語故侶鴈同歸
爲客多離合浮名半是非圖南吾豈敢願託北山薇

三

見說留都好郊游事事新鶯啼官舍曉花發帝宮春
詞賦爲君子湖山得主人六朝何足問擊楫大江濱

四

抵掌言時事推心讓友生馮唐慚論將陸贄善談兵
緩急衆相仗艱難獨不平未須榮結綬還擬請長纓

五

雙闕雲霄色三邊戰伐塵未能忘國恤終是愧人臣
及汝惜分手相期各致身如過嚴瀨上且莫羨垂綸

六

陸生新綰綬楊子久抽簪寥落惟中散羈棲在上林
五年幾握手何日一談心萬里江楓夜相思秋色深

聞寧夏平志喜四首

北闕飛書至西河下詔新九重猶罪已百萬始爲人
討罪君王命全城天地仁懸知舊父老喜極復沾巾

二

斧鉞刑初正瘡痍病未蘇六師同解甲列郡尚飛芻
亂後幾人在城頭片月孤朔方控西域漢武本雄圖

三

鄖浙年來事驕兵亦太寬恩威元自失反側詎能安
今日平河朔英風折可汗至尊應色喜擬向御樓
看

四

不謂三邊地仍煩六月師關河屯虎豹京觀戮鯨鯢
殺氣生星劍雄風戰斗旗將軍好乘勝急破海東夷

喜公孝與至夜話

不是經年別何知此會難星疑今夜聚春似故鄉寒
事往思髻亂愁來吐肺肝莫言君未達吾甚愧吾官
送孝與有事晉中

得子可銷愁愁來子不留客情寒似雨春色淡於秋
懸榻思同夢臨關羨壯遊相期無隔歲結束大刀頭
送操江中丞張正之四首

仗劍辭中禁揚帆濟大江舊居青瑣闥新擁碧油幢

坐鎮開天府、先聲下海邦、留侯在帷幄、籌策本無雙

二

獨秉臺端節、來提水上軍、樓船出海樹、鼓角入江雲、
南北今無限、安危併在君、至尊仍肝食、吾敢恨離羣

三

幕府前旌去、王程後命催、六師同擊楫、千隊肅銜枚、
練甲含江動、琯戈挽日回、莫將今日事、更待異時才

四

地重能相借、時危敢自安、不辭良會少、漸覺盛名難、
對月論肝胆、臨風惜羽翰、由來贈策意、非是爲彈冠

喜仲素至夜話

半年如久別、千里喜重來、有約仍聯榻、無心更築臺、
青燈同不寐、白髮兩相催、爲問東山上、桃花幾樹開

送仲素歸海上二首

惟有思歸客、難堪送別筵、茂陵吾卧病、彭澤汝歸田、
欲去頻更日、相期尚隔年、紫芝如可採、携手海雲邊

二

與汝同朝暮、憂來尚不任、天涯風雨夜、海內弟兄心、
未別愁分袂、相看淚滿襟、尊鱸吾所憶、應不待秋深

夜中書懷呈海叢二首

世事吾何問愁來日轉增半生憐病女中夜對寒燈
折節延醫卜寬心賴友朋舖糜吾願足安穩在漁罾

二

日日論歸計年年苦未能興因愁漸減官覺病難勝
萬態隨消長浮名易愛憎自慚非叔夜已復愧孫登

吳太華使君買姬

舊是瀛洲侶新移上苑花追歡邀夜月斂態出朝霞
笑擲潘安果嬌含碧玉瓜不知萬里外曾否怨秦嘉

寄珂弟

同氣方成立他鄉已倦游弟兄吾及汝歲月喜兼愁

病劇難消夏歸遲復待秋向來腸斷盡不忍更登樓

泛舟送別嘉猷二首

共有張翰興來陪郭泰舟樹深猶帶雨波淨已涵秋
久客看歸棹臨岐悵勝遊未能如潞水隨汝共東流

二

後會終難定清驩只暫同離筵偏惜日返棹乍分風
片鳥江湖外飛帆烟霧中預愁分手處旅思滿孤篷
送別嘉猷與直卿世用共坐瀛洲亭

亦是瀛洲地新分鴻鴈行離魂同黯淡歸興在滄浪
樹蔭消殘暑蟬聲送夕陽懷人看漸遠空憶水中央

不寐

欲寐不成寐將歸未得歸宦情何日好交道故人稀
七尺因名累孤踪與世違青山空在眼慚負薜蘿衣
孝與見訪別後寄詩荅四首

相逢意不盡相送復如何匹馬龜蒙道千山雨雪多
聞雞余起舞叩角爾行歌明歲薰風夜重來醉薜蘿

二

念我如饑渴逢君問急難千秋心自許半夜影相看
莫擊荆卿筑終彈貢禹冠綈袍無可贈嗟爾敝裘寒

三

汝謀將避地吾意已憂天客路愁風雪歸期逼歲年
艱難心獨苦慷慨病相憐不似山陰道空回訪戴船

四

不是陽春調還憂和客稀如何初服日更與故人違
白髮輕簪紱青山采蕨薇冶湖新卜築歲暮爾同歸

雄州道中

驅馬雄州道都門第四程人家收秫米估客買魚羹
密樹霜華薄寒波夕照平江湖方自此魏闕若爲情

登樓二首

實有看山興非關蹈海謀江湖仍戀闕風雨亦登樓

上古君臣際中原天地秋媿無黃石畧先從赤松遊

二

海氣兼秋色氤氳逐望生四圍山遠近半嶺日陰晴
人外寒蕪淨林端野燒平漸諳丘壑趣那爲避浮名

懷懋忠中丞二首

春雪滿長安懸知塞上寒飛花凝大纛和月照雙鞬
恩重君親並名高進退難試詢黃髮意曾否許辭官

二

令伯陳情疏千秋見汝真思歸因愛日將去且防春
余獨非人子能無念老親白雲滄海上極目轉傷神

大風荅世用二首

大地聲回薄千林影動搖天威誰敢測風伯亦何驕
雷雨虛相望塵埃苦未消願君調玉燭終日不鳴條

二

漫道春來好狂飈擁亂沙驚聞天號令愁掩日光華
暝色連千里濤聲響萬家寄言崔處士早護上林花

春雪二首

雲葉兼天合冰花到地融片輕猶帶雨勢穩不隨風
多病愁春冷將歸喜歲豐郢中誰作賦白雪苦難工

二

何意冰霜色能先桃李開偶分清禁影不爲艷陽來
白日雙扉掩清宵短棹回青山渾欲老玉樹莫相猜
挽材官海岳黃翁二首

鶴髮嗟今日貂裘憶少年老多兒女累貧得友朋憐
廿載成何事孤魂尚在邊贈刀嗟已矣掛劍轉茫然

二

今歲漁陽路前年冶水涯半生常作客垂死竟無家
塵已凝詩草霜仍吐劒花岱宗原故國莫復滯龍沙
送介軒家叔南還二首

將去且盤桓明朝欲見難歸鴻春後急匹馬雨中寒

又作天涯別兼懷膝下歡老親如見問稚子近來安

二

人外綠蕪平河梁遠送行獨醒看酒態久客羨歸程
夜話常聯榻心期在耦耕何時麥壠上雙坐聽啼鶯
送母南還書懷呈老父及示少弟四首

溽暑寧堪別春暉未抵恩風塵滿道路僮僕問晨昏
久客思將母高堂始見孫懸知今夜月兩地各銷魂

二

戀別且承歡慈顏忍淚看母應憐少子兒獨客長安
親髡年年改名途事事難膝前親受教知止勝爲官

三

拙宦登三品親年感二毛忍將家口累獨使父心勞
有客同杯酌忘機對桔槔食貧寧足問仲蔚本蓬蒿

四

坐惜護花別高吟棠棣篇汝才堪入洛吾道倦遊燕
莫倚冠裳族當知父母年明秋風力健應着祖生鞭

宿棲雲閣

曲徑穿林入高樓面水開鳥將雲並宿客與月同來
竹色四時雨泉聲半夜雷乍驚衣袖濕露下泛舟回
仲素違冶湖之約以詩見問賦荅二首

小榻君高卧名山我獨過客嫌今日少竹比舊時多
綠草雙遊屐蒼烟一釣簑停橈懷賀監孤負鏡湖波

二

莫問春遊事千花總笑君雨餘山吐月風靜水生雲
開徑延求仲臨池憶右軍草堂連歲約昨夜勒移文

送季韞弟以選貢廷試三首

愛爾凌雲筆長安獻賦來鳳毛行入沼駿骨合登臺
兄弟聯花萼君王問草萊明朝鹽鐵議莫遜漢時才

二

柳暗淄澠道蕭蕭暮雨寒不愁孤客去欲別老親難

白髮娛甘旨青雲策治安臨岐何必恨報主是承歡

三

寒夜阿戎語青山小謝遊最憐鴻鴈影堪慰蓼莪愁
汝又此時去吾將誰與儔季鷹有歸計斟酌在初秋

挽朱鑑塘司寇五首

俯仰嗟時事艱難失大臣平生憂 社稷垂死憶松
筠寂寞藏舟夜淒涼折檻人史魚猶未葬萬一悟

楓宸

二

一讀南臺疏朝紳總震驚當時拚已死今日凜如生

片語扶綱紀孤忠託 聖明誰知天仗馬放逐亦長

鳴

三

繡紱趨華省官同周六卿素棺還故里家似魯諸生
雨泣都門道霜飛稷下城歸魂何太晚前日是清明

四

安石吾家彥看公似友于九原阻一別千里託諸孤
挂劍方含慟輿棺已在途新阡看只尺曾訪戴公無

五

誰言燕市遠郭外卽天涯遺鬼不歸第孤魂空憶家

兩楹今日酒三月故園花不散英靈氣長虹接暮霞

冶水二首

如何滄海上風物似江南亂種王猷竹雙携戴仲柑
樓臺山對立烟雨水相涵欲共黃鸝語孤飛入翠嵐

二

不減元卿徑都無二仲遊花裊低擁砌柳幔近當樓
隔樹聞樵唱隨風漾釣舟臨淵何所羨只是愛清流

別業

何必入山深居然似漢陰雨殘雲在竹野曠日平林
近郭無人事爲農長道心柴扉炊黍罷端坐聽鳴禽

荅懋忠中夜見懷之作二首

客歲傳書札天涯若比隣如何同帝里翻似異鄉
人不對金蘭友空孤麩米春欲謀良夜醉好待月華
新

二

不柰妻孥病俄驚歲月遷跡堪同大隱身已過中年
短髮多愁裏孤燈獨影邊夜來誰與晤興在剡溪船
懋忠將行同于田夜坐因憶向年懋忠比隣亦
以雨中送別悵然有作

不謂新知樂仍兼遠別愁悲歡同此夕風雨似初秋

北漢集 卷三
把酒念今昔談詩當獻酬明朝卽長路斟酌數更籌
蔣符卿邀崔仲素及余同遊張大叅舊園亭二

首

大隱非陵數名園接郡城祇疑秋入夏况復雨新晴
樹古被龍甲花繁綴馬纓誰能邀二仲惟有蔣元卿

二

曲水環如帶蒼崖列九屏花飛三徑紫樓敞萬山青
勝地多興廢清狂半醉醒年年閱遊客獨有草堂靈

城河堤上望月二首

歸徑復相留泉聲夜轉幽星回天北極月落水中洲

耐可消煩暑何妨納細流坐疑圖畫裏但少木蘭舟

二

晚樹蒼烟合晴霄片月孤驪珠光不斷天鏡影平鋪
螢火時明滅荷香乍有無會心何必遠勺水亦江湖

過舊園

重過菟裘地空餘陟岵哀遺踪那可問舊客與同來
亭小存堂構園荒半草萊欲將今日酒和淚寄泉臺
同季韞用鳴二弟遊赤澗小園及觀石湖紫澗

瀑水三首

有小序

誦棠棣之章爭看韡韡睹蒹葭之色已復蒼蒼

方擬卜居正當在告名符赤甲地遠前門志向
平之五遊且爲地主携蔣卿之二仲况係天親
近看一水之如環遙指千山而作障寄吟何於
魚鳥託高賞於雲霞觀廣陵之濤煩疴乍起得
康樂之句塵夢初醒各賦新詩仍堅後約靡言
不報倡酬何異填篋無已太康做戒願同蟋蟀
秋色冷蒹葭長林遶岍斜看山頻召客近水欲携家
移席依楊柳沿溪問稻花未窮丘壑趣策杖入烟霞

二

修竹蔭清流荷花滿院秋已知三徑好况與二難遊

隔樹看調馬臨池欲狎鷗年來頻賜告一壑主恩優

三

雨過雲猶濕烟深徑轉迷乍聞人語響遙隔水聲西
岸抱孤村轉山連遠樹齊持竿聊寄興休擬釣璜谿

石朋

空谷秋聲急飛流下石巖憑虛飄玉屑滿壑挂冰簾
雲竇長風吼苔花細雨霑盤渦深不測疑有卧龍潛

紫澗瀑水二首

瀑水晴如雪濤聲晚作雷誰教天漢落坐遣地維開

萬馬乘秋下雙虹遶澗迴早知茲壑勝悔不抱琴來

二

絕壁雙流峻藤蘿未敢攀幽寧耽一壑高已歷千山
暗谷驚風雨清秋響佩環朝宗應北向到海不辭艱

山徑

地僻無車轍行歌有負薪青山一徑遠白屋數家貧
密樹頻旋馬迷途屢問人不因烟色暮溪上且垂綸

晚歸

歸路寧辭晚殘霞嶺外明乍驚深谷斷忽見小橋橫
雲盡山隨馬天空月近城懸知今夜裏池草夢中生

胡使君罷郡將別以雙鶴贈余曰此鶴足相方
也其一昂藏有翩翩寥闊之志其一病翅然本
屬同侶亦復依依余讀其詞悵然不能爲情爲

賦五言四章

海鶴勞相贈長鳴似念羣翮疑千仞下聲已九天聞
願比雙黃鵠同棲三素雲只愁珠樹影難謁玉宸君

二

病鶴何年病經秋尚未蘇骨驚清露冷影對夕陽孤
澤雉堪相狎鞫鷹莫浪呼何當雙翼翼健萬里下平蕪

三

鍛羽嗟吾道乘軒况爾曹自應銷病骨其柰析秋毫
霄漢憐雙影風霜感二毛中宵空起舞誰爲聽鳴臯

四

縱是經年病能無戀主心夢回三島近愁隔五雲深
此日悲同侶因風憶上林試將別鶴引持比鶴鴿吟

同館中諸兄集張質卿次韻

共有王猷興無妨蘇晉齋偶然逢客語忽復散人懷
片月流雙闕微塵淨六街直宜秋色冷獨與素心諧

大祥上冢書懷示弟五首

生別只天涯孤魂不到家壠頭空雨淚顏鬢已霜華

石馬嘶風急松門墮月斜永懷風木恨反哺愧林鴉

二

扶病沾新命開阡比上卿可憐三日侍不盡百年情
多難憂家國殊恩激死生孤臣無寸補北望裊心驚

三

有兒應見憶書不到人間昨夜愁中夢猶驚病裏顏
恩仍瞻舜日壠自拱堯山

堯在堯山下

舞袖啼紅血都非

舊日斑

四

病起仍成病愁多不耐愁青燈孤照影白髮暗驚秋

尚作蘭芽夢空人憂黃泉猶自涸清淚幾時收

五

伯氏自吹埴高堂獨樹萱秋風空殞涕夜月轉消魂
望汝延三益相期慰九原有懷長不達搔首背晴軒
同季韞用鳴弟遊赤澗菜園頗有卜居之志二

首

緩步尋鷗渚同遊接鴈行草連平野綠天與遠山蒼
小徑隨流水孤村帶夕陽若教栽五柳便擬作柴桑

二

何處堪為圃君其問水濱好營五畝宅寄此百年身

碧樹寒仍發青山遠更真三公是何物嗟爾灌園人

同兩弟觀荷花有感

坐對芙蓉沼行歌棠棣吟相依香漠漠獨立影沉沉
人自憐芳艷誰當識苦心秋風漸蕭索結子已如金

贈兗郡司理周公乃翁二首

翁舊為漢陰長

魏闕疏恩日江天問少微自為彭澤宰久息漢陰機
麗日開綸誥晴雲絢舞衣清時須獻替青瑣奉庭闈

二

誰執于公法因傳劉向經南陔方獻壽東郡儼趨庭
優詔臨丹壑華筵醉綠醞如陵應有頌遙指魯山青

同曾直卿張泰亨教嘉猷送余世用歸葬兼思
敬承四首

都門相送處賓客白衣冠不見荆卿去蕭條易水寒
遽成生死恨轉見別離難尚有遺文在歸來掩淚看

二

地遠堂廉隔天高進退難未披陶侃疏空對史魚棺
倚仗憑誰料身名幸汝完壠頭松栢樹應解指長安

三

生前作死別死後憶生平念汝魂將去令余夢亦驚
文章千古事兄弟九原情腸斷河橋路蕭蕭候鴈鳴

四

廿載渾如夢遺踪不可尋那堪垂白髮相對哭同心
隔世淵明酒臨風子敬琴陸雲如可遇地下有知音

劉少宰及曾朱二宗伯有事于南郊天街望月
以詩見示用韻奉答二首

東觀班行舊南郊秩祀同惟應香案吏偏近水晶宮
一線回元氣孤標正八風羣生何日遂請為問蒼穹

二

閣道通銀漢高丘挂晚霞九重天咫尺三五月光華
雲作瑤臺幙霜飛玉樹花怪來多白雪曾是泛仙槎

北漢集 卷三 三十一
大祀齋居書懷呈李太宰二首

畫省慙金鏡齋居集玉珂乍驚新劍珮還對舊藤蘿
公署有二古藤 夢逐飛葭遠才慙 漆多上書多未報敢問
夜如何

二

視朔何年事書雲詎敢憑煖應思曝日寒尚畏堅冰
閱世嗟馮衍憂時媿李膺泰交如可見矯首一陽升

端揆堂月下與李太宰共話

清切東曹地閒居一事無天懸如水鏡人自坐冰壺
引領前星耀驚心片月孤那堪添繡縷直擬伏青蒲

冬至祀南郊承 遣分祭風雲雷雨壇

寶瑟迎神奏燔柴謁上玄未能瞻紫極何以格皇天
雲雨從龍日風雷悟主年甘泉休作賦願上我將篇
題遲竹窓園亭二首

二

何處堪乘輿名園擅海邦荷風清入坐竹月澹臨窓
調馬開金埒邀賓倒玉缸怪來琴曲好階下水淙淙
密樹叅雲合飛流與砌平汲泉烹鹿竹避暑卧桃笙
花氣沾新雨鶯聲報晚晴西來多爽氣一帶遠山橫

代肖翁有懷戲集古字

北漢集

卷三

三十一

投桃人已遠擲果與偏饒翠鬢題紅葉明粧憶紫簫
雞聲催夜月蝶夢斷春宵金屋思佳麗偏憎鴻鴈遙
歲暮答懋忠

久別何時會殘冬又復春夢隨關塞遠愁共歲年新
事往如前日書來似故人濟時公等在吾意老垂綸
病中二弟至

乍見喜還驚相看百感生汝能千里至吾覺九愁輕
有病思鄉曲無人似弟兄燈前十載事凄惻不勝情

馮琢庵先生北海集卷三

齊郡馮琦用韞著

馮琢菴先生北海集卷四

詩

七言律

送李汝培侍御視關中馬政

秋日有懷懋忠

陪祀長陵

送家叔驃騎度遼

寄淮陽守鑑弦舅

居庸關

遊廣福山寺

小樓漫成

秋晦夜有懷京邑

夜懷宋鑑弦母舅舊淮陽守

冬至祝釐二首

葡萄二首

同世用開之登法藏寺浮圖絕頂

送范鴻臚謫官歸瑞陽

寄壽朱鎮山大司空

過故相第

九日獨酌

九日曾植卿張質卿薄暮見訪

家君之官和州三首

駕幸天壽山復閱壽宮二首

夜過見泉承惠詩篇率爾奉答

登顯靈宮閣

九日王育明石伯詹舍弟共酌

薄暮先歸漫成

公亮將別借過敬承夜話

送唐客部仁卿予告歸粵

九日同魏見泉余雲衢登顯靈宮分賦二首

登玉皇閣

秋夜獨坐偶成

萬壽聖節侍班待漏簡揚奎垣太史

送李將軍總戎上谷

同泰亨茂仁飲吳少保第

過懋忠見諸郎喜而成詠

送弘陽鄉丈 冊封粵藩二首

同懋忠小坐以詩見示次韻奉答

夜共孝與話別兼懷子愿

送周礪齋太史 冊封滎陽王過家省覲

元日思歸東懋忠

讀懋忠詩多贈別懷舊之作茲復遠別感賦

七夕送別嘉猷

新春同端叔汝培飲世用宅

同世用宗伯訪端叔中丞因留小酌

人日同世用汝培飲端叔宅

十三日同世用端叔飲汝培宅

十六夜邀世用端叔汝培小酌

有感

馬侍御言事被謫

元夕待介軒不至

為王介石兵憲題中流介石圖

題仲素撫松亭

喜仲素至夜話

于年伯聞余請急以詩見寄更二年追答

謝于年伯見慰之作

送郡守范公之關中苑馬少卿

題楊中丞思親樓

題中丞望京樓

登雲門山二首

寄壽于秩宗年伯二首

邢司馬經略朝鮮五首

送別孝與同遊赤澗菜圃

九月同房恒太玄諸君子遊周氏園亭

劉惟道邀諸君子同遊王司馬河陽花塢

張子宜子貞招余同恒泰宏泰惟道小酌

送魏中丞撫晉中

季母壽詩

送葵南胡郡伯歸閩鴻洲燕郡丞歸楚二首

九月八日與孝與夜話兼讀見貽之什

初至奉高與穀山年伯夜話

九日三陽庵別穀山年伯

寄邢制府

送少宰裴年伯予假歸閩併呈李太宰二首

寄答揚濟寰中丞

得懋忠書兼示晉中官評

元旦憶懋忠

除夕書懷

紙房與季韞弟聯榻書懷

同諸友飲房宏泰新第

太宰李年伯邀余携具過少宰裴年伯

陪李裴二年伯皆以詩見示次韻奉答

敖宮詹嘉猷以余初度惠詩書懷奉答二首

楊年丈暫晤京邸仍之閩中總憲贈別三章

邢太保以大司馬筦留鑰過家省覲二首

魏中丞歸養喜而有贈二首

送表弟宋元昭將軍度遼從李大將軍二首

七言律

送李汝培侍御視關中馬政

羣山北折擁遐荒，道路爭看繡斧光。
不獨驛驛稱國馬，坐教魑魅避神羊。
桃林渺渺春多雨，栢府沈沈夜有霜。
誰向龍門堪御李，惟應漢署憶馮唐。

秋日有懷懋忠時懋忠在秦

坐對新秋憶舊歡，客無同調夜偏寒。
名山恨不同余往，令節還愁見汝難。
別後起居雙尺素，夢回風雨二長安。
可憐一片中宵月，君在三峰頂上看。

陪祀長陵

北海集 卷四
文皇陵墓枕居庸王氣連雲正鬱葱原廟衣冠千古
淚帝圖襟帶萬山雄至今魚海無傳箭見說烏號
有墮弓夜雨崆峒仙仗杳六龍松柏尚嘶風

送家叔驃騎度遼

長城萬里阻三韓曉月秋霜照玉鞍大漠名王休近
塞中原飛將欲登壇馬嘶邊地黃塵合劍倚胡天白
日寒聞說六師驃騎最酬恩早為斬樓蘭

寄淮陽守鑑弦舅

故園春色近如何笑指浮雲寄詠歌南國由來多蕙
苾東山且可問松蘿三年臥治淮陽郡千里澄清瓠

子河爲憶舊時行部處棠陰不散暮煙多

居庸關四首

羣山如帶界中原南控京華國勢尊萬雉不教殘地
脉千峰直欲倚天閣煙封鳥道雲難度風起龍沙日
易昏谷口湯泉今在否乘槎無意問河源

二

巖岫中開小徑懸巨靈高劈不知年乍臨萬壑疑無
地纔度重門別有天壯士弓刀常帶雪將軍帷帳迥
浮煙書生不請長纓去劍氣猶堪照斗邊

三

居庸近接軍都地，四塞雄圖入望開。
襟帶千峰常北折，梯航萬國盡東來。
雲橫遠岫疑生雨，風落長關欲作雷。
定鼎祗應歌祖烈，清時不數勒銘才。

四

五年不出居庸道，今日重來感舊遊。
紫氣遙瞻龍虎地，青山近接鳳凰樓。
平臨星斗三千尺，下瞰燕雲十六州。
但使此關長鎮靜，不煩仗策取封侯。

遊廣福山寺

山有仙人博處

對削雙峰小徑開，丹梯翠壁轉縈回。
空香縹緲諸天下，秋氣蕭森萬壑來。
青草斷碑餘古洞，白雲殘局冷

仙臺。山僧野老堪同坐，海鶴汀鷗莫浪猜。

小樓漫成

砧聲不斷暮煙收，鴈度晴空人倚樓。
晏子舊居元近市，蔣生新徑故宜秋。
露滋碧草寒猶薄，雲濕青山翠欲流。
清興杳然何所寄，憑欄東望是滄洲。

秋晦夜有懷京邑

九秋節序暗相催，風入疎帷夜自開。
嚴助元非勞侍從，陶潛真喜賦歸來。
夢依三殿飛龍袞，望斷千金駿馬臺。
天祿故人相憶否，鴈行不繫尺書回。

夜懷宋鑑弦母舅舊淮陽守

蕭蕭門徑掩修篁，落落寒星帶草堂。宋玉故應裁郢曲，汲公何意薄淮陽。霜清小院琴書冷，雲臥空山薜荔蒼。時序漸更雙鬢改，莫言常戀芰荷裳。

冬至祝釐二首

陽生緹室葭灰動，春近琳宮翠幄開。佳氣籠葱天北極，瑞煙縹緲日南來。未從視朔觀周禮，自爲書雲上魯臺。遙想九霄芸閣吏，珊珊玉珮散朝回。

二

去歲茲辰供奉班，中朝蕭穆漢衣冠。諸方盡入天王貢，聖主親郊太乙壇。雲覆離宮華蓋轉，霜清輦道

玉珂寒，虛疑咫尺威顏在。翹首天門謁，帝難。

葡萄二首

晻曖繁陰覆綠苔，藤枝蘿蔓共縈回。自隨博望仙槎後，詔許甘泉別殿栽。的的紫房含雨潤，疎疎翠幄向風開。詞臣病渴沾新釀，不羨金莖露一杯。

二

一架扶疎碧水潯，午涼不散綠雲深。芳香未釀醞醐味，秀色全滋薜荔陰。紫玉含風秋液冷，玄珠入夜月華侵。莫言西域傳來晚，猶及相如賦上林。

同世用開之登法藏寺浮圖絕頂

七曜迴光照井翰，九霄宿霧護旃檀。珠搖大地河山影，檻壓中天沆瀣盤。隱隱樓臺分北極，蕭蕭風雨出西巒。二君並有凌雲氣，指點神州賦未難。

送范鴻臚官歸瑞陽

信是承明謁，帝難都門已挂惠文冠。江湖一葉渺然去，虎豹重關迥自寒。避世何期同范蠡，論交能復憶馮驩。漢家宣室應相召，莫向滄江老釣竿。

寄壽朱鎮山大司空

玉節玄圭鎮上游，懸車高臥五湖秋。三朝出入榮殊錫，一代平成藉壯猷。帝自金堤思劍履，人從水

部見弓裘傳聞禹蹟多，靈異歲歲江南獻海籌。

過故相第

長安變態杳煙霞，賓客紛紛田竇家。燕子已歸誰甲第，牡丹空泣舊繁華。十年黃閣沙邊路，幾日玄都觀裏花。寂寞重門車馬絕，後庭無樹夜棲鴉。

九日獨酌諸君有西郊之遊僕無與焉

高秋落木滿長安，風雨重陽慘不歡。鴻鴈乍來霜信早，黃花不發菊盟寒。天涯弟妹書難到，客裏壺觴興易闌。諸子茱萸應插遍，殷勤爲寄一枝看。

九日曾直卿張質卿陸敬承費國聘薄暮見訪

北海集 卷四
寂寥誰當慰索居浮雲暮色正愁予二三兄弟能相
問重九風流尚不虛入夜青藜堪自續遶籬黃菊未
全舒莫言側弁疎狂甚猶是龍山落帽餘

家君之官和州三首

十年攬轡龍荒地今日單車入楚疆六代襟喉連白
下四圍山水近滁陽此邦信美非吾土去國雖遙是
帝鄉渺渺行塵看漸遠平原秋樹晚蒼蒼

二

始知畏路大難工淚灑江天賦轉蓬三世起家州刺
史十年出塞漢雲中物情任自矜周璞往事何心問

楚弓聞道烽烟猶未靜醉看雄劍倚長風

三

鄉心惆悵白雲飛一問郵程淚滿衣羈旅孤臣從此
去京華遊子欲何依殘霞天落濡須水明月江空采
石磯別後幾時書信達只愁秋盡北鴻稀

閏月九日駕幸天壽山復閱壽宮二首

松栢平臨御道開旌旗遙拂五雲來始知三駕飛龍
地不是千秋戲馬臺仗外星辰皆北向望中巖岫盡
西迴侍臣扈從登高處共上南山萬壽杯

二

帝陵佳氣鬱蒼蒼龍武千軍奉 玉皇山與翠華同
一色天臨黃道又重陽九秋霜靄迎仙仗萬壑烟霞
接御香此日周王方定鼎十年卜世共靈長

夜過見泉年兄承惠詩篇率爾奉答

數從問字過西鄰下榻相看意轉親何物炎氛銷大
夏惟應高唱有陽春一庭新雨苔侵徑滿坐涼雲月
近人清會來宵還可續莫教談塵靜生塵

登顯靈宮閣

極目長空鴈影南千峰當檻落晴嵐清秋斜日窺金
象古木寒雲鎖石龕地迴樓臺二島接天低烟樹萬

家含虛疑縹緲緱山嶺時有簫聲駐鶴驂

九日王育明石伯詹舍弟共酌時舍弟將東歸
矣

風雨重陽萬木寒蒼然秋色滿長安自携北海先生
酒不減東籬處士歡節序他鄉同落帽雲霄吾黨一
彈冠明朝又折河橋柳今日茱萸莫漫看

薄暮先歸漫成

天涯節序強歡娛落帽風前客思孤酒力漸消人易
倦鄉書欲寄鴈難呼一天涼雨催庭菊九日西風下
井梧寄問故園諸少弟相思誰為插茱萸

公亮將別借過敬承夜話

對几憑欄話舊踪夜深寒雨帶疎鐘何人解送揚臨
賀愛客真推陸士龍去住風塵同寂寞悲歡情事未
從容醉歌不淺今宵興又是明朝思幾重

送唐客部仁卿予告歸粵仁卿自去歲已請告
矣

暫辭蘭署問松蘿握手其如欲別何客棹漫衝羣鴈
度歸旌遙指五羊過更生自愛傳經好長孺年來賜
告多知汝冥鴻無限意願將招隱代驪歌

九日同魏見泉余雲衢登顯靈宮高閣分賦

咫尺蓬萊謁上玄秋空極目正蒼然畫圖不散猶龍
氣風俗仍傳戲馬年禁裏樓臺二殿迴城頭雲樹數
峰懸相看盡是游仙侶醉把瓊簫弄紫烟

二

阿閣峻嶒倚絳霄相傳棟宇自先朝金書玉笈無
消息菊蕊萸枝對寂寥天近百靈環帝座秋高萬籟
奏仙韶下看人世勞何事九陌飛塵總不銷

登玉皇閣

洞霄高閣接長空大地河山指顧中供奉久爲香案
吏追隨同上玉虛宮珠簾拂曉偏宜雨蠟屐乘秋好

御風矯首神州惟一氣不知何處問鴻濛

秋夜獨坐偶成

丹鳳城西小苑開夜深清露冷蒼苔寒星歷歷疎螢度落木蕭蕭候鴈迴涼雨乍收雲滿樹碧天如洗月臨臺中宵不掩雙扉臥恐有相思命駕來

萬壽聖節侍班待漏簡楊奎垣太史

長安紫氣曉氤氳翠蓋紅旂望未分萬國衣冠朝集使九關虎豹羽林軍未央正問周王夜復旦同瞻舜帝雲列宿一時同拱北願將南極祝明君

送李將軍總戎上谷

秋高虎幄陣雲生地盡龍荒劍氣橫虜帳近連秦上谷軍麾重拜李西平中宵風雨鳴刁斗萬里天河洗甲兵歲歲名王稱屬國不煩繫頸請長纓

十四夜同秦亨茂仁飲吳少保第

上公開宴奏雲和詞客招歡集玉珂急管嬌歌人已醉銅壺銀箭夜如何爭看綺席邀明月直訝星橋接絳河此夕漢宮傳蠟燭五侯春色定誰多

十六夜過懋忠見諸郎喜而成詠

徙倚高軒望月輪幽居不受綺羅塵縱無濁酒酬佳節未厭清談對故人何處銀花偏照夜滿庭玉樹別

成春看君便作高陽里元凱何時起鳳麟

送弘陽鄉丈 冊封粵藩二首

帝遣雄藩鎮百蠻仙郎使節五雲間爭看叱馭王陽去不比分金陸賈還八桂封疆連翼軫千秋帶礪指河山王程莫漫耽幽興遲爾道遙供奉班

二

龍旂大輅荔江濱萬里山川入賦新地接三危仍建國天臨百粵盡稱臣梅花嶺外迎朝使椰葉陰中間主人道路流離憂不細看君何以獻楓宸

同懋忠小坐以詩見示次韻奉答

綠陰寂寂覆蒼苔小徑蓬蒿待汝開塵世猶能容吏隱青山且莫賦歸來故人笑語花相對終日狂歌鳥不猜萬態浮雲終自定此中相見但銜杯

夜共孝與話別兼懷子愿

離心已寄灞陵塵夜雨連牀意轉親客邸疎燈同此夕故園芳草動經春眼中交態誰知己世上浮名不借人君過黎丘相問訊若為披豁對吾真

送周礪齋太史 冊封滎陽王過家為伯母壽

大河春樹接滎陽六傳飛塵出建章文似馬卿新授簡情同羊叔更稱觴皇華擁節開侯甸青鳥噉書過

北海集 卷四 五
海鄉兩地風謠如可采齊都洛水共泱泱

元日思歸東懋忠

東風依舊是天涯坐對椒盤懶頌花
雙闕未曾瞻日表半生真覺負年華
宦情老去仍憂國客况閑來倍憶家
稍喜青春堪作伴故山遙指海邊霞

讀懋忠詩大半贈別懷舊之作茲復遠別感而

成詠

憶余南下楚江湄憶汝西遊華岳祠
仕路百年偏得別離情一日即相思
天涯踪跡誰同調篋裏詩篇只自披
君到鴈門關上望書來好及鴈來時

七夕送別嘉猷

銀河萬里接長安轉爲分携惜合歡
隔歲女牛相見少老年兄弟遠離難
尊鱸一夜秋風早砧杵千家月影寒
明日便爲橋上別人間天路兩漫漫

新春同端叔汝培飲世用宅

春風杯酌日相邀誰道楊雲尚寂寥
故侶正宜清夜飲主恩已放紫宸朝
敢因對局矜長勝且喜論心得久要
慷慨酒闌仍擊筑憂天無策轉招搖

同世用宗伯訪端叔中丞因留小酌

新年朝謁病全疎翻覺長安一事無
爲約稽康同命

北海集 卷四
駕來尋張翰共呼鱸羣公盡避中丞馬列署爭看御
史烏回首瀛洲亭上客春風如舊鴈行孤

人日同世用汝培飲端叔宅

去年此日人相憶此日新年對故人
人得同心堪卜夜天於勝日倍生春
冒寒酒盞寧辭醉垂老交情始見真
怪底塵襟清似洗滿空霜月淡如銀

十三日同世用端叔飲汝培宅

銀臺應不減烏臺小閣邀賓綺席開
地近上林花欲發天將元夕月先來
停盃舊事還重省刻燭新詩取次裁
且去且留仍訂約何時重醉後庭梅

十六夜邀世用端叔汝培小酌

長安燈燭接烟霄小酌清談興自饒
人世幾能兼四美月華况不減元宵
九衢羅綺驕春色萬戶笙歌託聖朝
乍似火城催劍珮曉來轉覺漢宮遙

有感

飛雪隨風下九關蕭蕭寒色靜朝班
匹夫有罪因懷璧逐客何年得賜環
歸路春衣皆白袷滿庭夜夢到青山
可憐立仗龍媒種未及長鳴已放還

馬侍御言事被謫

聞君薄譴出神京始信天王自聖明
松栢臺前烏

欲散梧桐花下鳳初鳴一官差可酬孤憤片語猶堪
置死生盛代爭臣原不乏何須著論激陽城

元夕待介軒不至

迢迢更漏隔城闌徒倚空齋憶酒人豈是金吾偏禁
夜惟應玉洞自生春琴中流水寧無意賦裏行雲似
有神為問清宵同夢者雙蛾可比月華新

為王介石兵憲題中流介石圖

獨立滄溟萬里潮扶桑若木豈為遙坐清大海鯨鯢
窟直駕中天烏鵲橋欲問銀河誰解挽試看金甲已
全銷好將百尺波心石移作千秋銅柱標

題仲素撫松亭

大澤山前大海隅海山迴合小亭孤如何五柳稱居
士却對雙松似大夫三徑寒濤清不斷千峰晴雪冷
相扶旁人錯比神仙宅蜃氣樓臺知有無

喜仲素至夜話

小閣清燈設榻初微雲淡月夜窻虛囊無京國綾紋
刺凡有仙人栢葉書松下止疑君是鶴濠間莫問我
非魚從知崔顥多佳句欲和陽春恐不如

于年伯聞余請急以詩見寄有都門又作畫圖
看之句猶謂余以吉行也更二年始追道苦懷

抄

以答之

素車白馬 帝城隅時有太莫擬都人作畫圖、聖
 主威顏違咫尺嚴親衰病願須臾露凝淚共芙蓉冷
 風急身同鴻鴈孤媿殺繞枝南去鵲不如庭樹夜啼
 烏

謝于年伯見慰之作

風雨蕭蕭冷素帷書來父執倍淒其先臣垂死承恩
 日孤子餘生泣血時啓手未酬烏鳥恨斷腸真廢蓼
 莪詩傷心千里同胞在劍挂斜陽隴樹枝

送郡守范公之關中苑馬少卿

河山十二舊分符雲錦三千亦壯圖沙苑終年歸塞
 馬海邦今日靜天吳甘棠春雨留齊甸首宿秋風近
 漢都為問希文祠下井不知清比使君無

題楊中丞思親樓

層樓縹緲俯塵寰畫棟朱欄尚可攀依舊慈烏啼樹
 杪總無白鶴到人間五龍深鎖橋邊水樓近五百雉
 斜連郭外山惟有蕭蕭庭下竹當年曾對舞衣斑

題中丞望京樓樓在瓜市

濟川豈合老滄洲况復時艱藉壯猷漢殿九重迷曉
 望齊城十二入邊愁天連紫極思明主地接青門

北溪集 卷四
即故侯自是子牟常戀闕非關庾亮獨登樓

登雲門山二首

矯首層巔御遠風晴嵐萬壑散鴻濛乍驚閭闔通天
上遙指河山落掌中九疊雲屏高自掩千秋寶鏡照
還空未論三島神仙窟咫尺人間路不同

二

萬仞巒岈倚太空洞雲深處碧雲叢清秋白日懸孤
月古木蒼崖響大風疑有五丁開道路欲從四塞弔
英雄海氛東望頻翹首轉憶安攘仲父功

寄壽于秩宗年伯二首

廿年講殿捧牙籤太乙青藜照御函池上夔龍思聽
舄海邊鷗鷺對抽簪朝廷獻替仍虛左天下文章
在指南盛事已兼三不朽爲公但祝百斯男

二

南省卿雲近紫微明光曉奏勸宵衣自從劍珮歸滄
海不見鸞輿出禁闈一曲春湖明主賜十年芳草
故人違莫教綺季山中老且爲皇儲定是非

邢司馬經略朝鮮五首

瑯戈十萬指扶桑絕域爭依袞繡光帝用元樞爲
鎖鑰天迴大海作金湯樓船春泊雲連水幕府宵嚴

北海集 卷四
月似霜稍放西羌置都護即看南粵繫名王

二
王師水陸四元戎經略全兼節制雄天上兵符占太
乙軍中殺氣接長虹健兒格鬪無生死朝列飛章有
異同試問唐宗平壤後何人開府海雲東

三
寧因屬國敵中華萬里要荒自一家南下將符兼五
嶺西來兵力盡三巴馬頭龍雀驚相顧隊裏貔貅靜
不譁莫問分營屯海外只愁轉餉到天涯

四

揭來海內稱虛耗况是防倭復備胡重譯何年歸白
雉大軍經歲守玄菟天山劔鏑含霜冷明月刀環入
夜孤萬馬連宵催轉戰中權親挽繡螯弧

五

誰將長劔斬長鯨氣懾天吳不敢驚白羽一揮神策
將朱旂三破鬼方兵風回草木開雲陣山蹴波濤列
海營今日華夷須混一肯容孤島請行成

送別孝與同遊赤澗菜園

一會何堪抵別愁未能分手且同遊人家雞犬桃源
路野水蒹葭剡曲舟憶昨論心還聽雨即今送遠更

悲秋明年便是湖山主期爾東鄰借許由

九月同房恒泰玄同張立庵和庵劉大噩遊周

氏園亭

顏延年作五君詠蓋竹林諸賢王戎山濤以貴見黜戎日夜持籌孳孳言利即不貴亦當黜若濤不負其官即不負吾君矣古人或隱而隱或仕而隱與夫仕而不媿其隱即避世金馬門豈不稱大隱哉愚謂黜戎甚當黜濤則延年之偏也

青林白露滿亭臯天外千峰爽氣高九月陶家新菊

徑千秋范叔舊綈袍論心且喜逢三益握手相看感

二毛莫以五君堪入詠遠因薄宦黜山濤

劉惟道邀諸君子同遊王司馬河陽花塢步過

孫叅知竹園

司馬名園接近關蒼崖白石鎖潺湲漫隨劉子看花

至虛擬王猷對竹還橋影雙龍臨巨壑樓標百雉壓

羣山自憐踪跡終城市不及輕鷗作隊閒

張子宜子貞招余同恒泰宏泰惟道小酌

廿年宦海白頭新不及燈前對故人為有同心交似

水坐教殘臘氣如春二難况復聯兄弟六逸何須問

主賓共說張華龍劍好會看雙躍下延津

送魏中丞撫晉中二首

玉節乘秋出漢宮牙璋如雪指河東井陘鼓角從天

下上黨山川接塞雄何必馮唐能論將即看魏絳已

和戎上兵自昔稱全國莫漫輕邀破虜功

二

千里雄關接冀都，崑崙天外控匈奴。試看鐵騎新行塞，不比金繒遠賜胡。節制總歸中執法，威名先到小單于。塵消玉帳渾無事，獨立轅門片月孤。

季母壽詩

中宵婺彩映春暉，欲借長裾作舞衣。共羨平陽爲相國，况當潘岳奉慈闈。鳳雛愛日依朱邸，龍誥從天下紫微。東望滄溟看咫尺，瑞烟長繞五雲飛。

送葵南胡郡伯歸閩鴻洲燕郡丞歸楚二首

季壽

征車南去渺難攀，何日孤臣得賜環。閩海有龍歸劍水，楚天無鴈到衡山。千峰自吐金銀氣，雙闕誰當虎豹關。聞道除書猶未報，兒童爭望使君還。

二

齊門風雨晚蕭蕭，楚塞閩天道路遙。繡斧誰乘司隸馬，朱輪競插侍中貂。寧因黃綬憐知己，自爲蒼生惜聖朝。莫以鄉心耽薜荔，漸愁權稅到漁樵。

九月八日與孝與夜話兼讀見貽之什

朝遊聯珮夜聯牀，咫尺伊人又一方。握手一年爲一夕，驚心明日是重陽。霜前鴈陣涵秋色，筆底驪珠吐

深

夜光欲問元龍天下計漫言中散醉時狂

初至奉高與穀山年伯夜話

單車踏遍萬重雲半爲名山半爲君乍語舊歡頻拭
淚却驚新會是離羣神霄曾識蘭臺侶仙洞重披玉
檢文明日峰頭同北望長安秋色正氤氳

九日三陽庵別穀山年伯

曉隨仙侶叩玄關白日黃花滿目斑客裏茱萸堪共
醉樽前楊柳莫輕攀未酬明主空憂國不奈離情
且看山明日征車何處宿白雲獨伴謝公還

寄邢制府

虎符龍劍碧油幢爲斬長鯨下海邦後騎未離遼海
郡前驅已度大通江螯弧一指朝摩壘斧鉞雙懸夜
受降稍待功成畫麟閣雲門烟月引歸艤

送少宰裴年伯予假歸閩中併呈太宰李年伯

新承休沐主恩殊始覺鄞江勝鑑湖司馬從來稱
水鏡季鷹何必憶尊鱸愁看宮闕寒雲白夢入松楸
片月孤屈指堯階莫莢換思君何處詠都俞

二

欲賦驪駒不忍聞那堪暫會是離羣若教綠野歸裴
令誰向龍門御李君劍珮正思東省會薜蘿休勒北

北溪集 卷四
山文時危轉覺恩光重二老峰頭望五雲

寄答楊濟寰中丞

漢宮春陌舊鳴珂萬里遙傳白雪歌豈有東曹稱水鏡
喜看西粵擁霜戈廿年蘭臭同心少五嶺梅花入夢多
媿殺張衡還近密桂林不見思如何

得懋忠書兼示晉中官評

白雪紅梅七見春書傳關塞倍傷神憐君欲去如烏
鳥笑我重來似鴈臣但覺魏徵多斌媚還知郭泰善
人倫玉隄尚記分携處依舊青青柳色新

元旦憶懋忠

都門轉眼逢新節客舍驚心憶舊歡鐵騎瓏戈春上
黨星橋火樹漢長安天涯明月遙相對眼底浮雲不
共看欲問離愁無所寄鴈門關北北風寒

除夕書懷

青熒燈火對寒宵客比楊雲更寂寥半夜夢魂千里
外兩年心事一身遙苦因少弟留慈母未代先人答
聖朝安得青陽開左个欲從天路誦祈招

紙房與季韞弟聯榻書懷 不應入律

秋色催寒病催老白髮難除葉難掃野店寧知夜淺
深孤燈細話愁多少我已三年泣蘭玉汝亦累舉羞

妻嫂雞鳴蕭蕭風雨急對擁寒衾坐天曉

同諸友飲房宏泰新第

春風初至雪初殘新第新年續舊歡大厦自堪來燕雀故人相對有芝蘭華燈照夜驪珠濕寶月當天玉鏡寒明夕元宵知更好星橋火樹擬同看

太宰李年伯邀余携具過少宰裴年伯

清宵杯酒屢相將曲席親依北斗光幸有青雲聯世契不知寒月是他鄉燕臺擊筑心猶壯杞國憂天鬢已蒼裴李齊名今再見何妨吏隱老馮唐

陪太宰李年伯過少宰裴年伯皆以詩見示次

韻奉答

悔別青山憶望諸為憐同病賦同車喜從清夜陪高會愁望承明隔直廬對酒何妨呼白墮談詩已覺勝黃初棋聲乍斷寒更遠殘月盈盈簾影疎望諸齊數澤也敖宮詹嘉猷以余初度惠詩書懷奉答敬次來

韻二首

獻賦同時謁漢宮驚看白髮兩成翁卜居乍可隨詹尹啓事寧堪佐上公老母無書仍在遠孤臣有疏半留中十年未對君王面咫尺紅雲是轉蓬

二

初度何堪擬魏公來詩有名字韓公之句喜歌白雪調相同顧
 余敢望為霖用期汝先收捧日功身是魯人終蹈海
 心懸漢殿尚呼嵩未成報國家仍遠紫禁青山兩夢
 中

楊太史年丈暫晤京邸仍之閩中總憲贈別三
 章

紫殿曾參法從班重來無復覩 龍顏水經延浦仍
 分劍月滿燕臺未賜環意氣尚吞雲夢澤宦情長對
 武夷山九閣近日如天上鳳閣鸞坡亦是閒

二

抱玉荆山苦未明和歌燕市意難平回看歲月同朝
 暮細話交游半死生市駿千金名未滅聞雞五夜夢
 還驚可憐送別河橋客不到陽關第四聲

三

外臺何必減中臺萬里清秋憲府開欲藉故人同報
 主為憂世事更憐才酒同季布非難近路似楊朱轉
 易哀舊日玄都休謾說桃花無恙待君來

邢太保破倭功成以大司馬筦留鑰過家省觀
 太夫人三首

雲霄漢闕頒新命豐鎬周京奠舊邦九列獨高蒼玉

珮六師爭擁碧油幢橫戈絕域春浮海擊楫中流夜
渡江、聖主憂先根本計留侯籌策况無雙、

二

北虜南倭總蕩平、山濤未敢罷談兵、烟消大海鯨鯢
窟風起長江虎豹營、鎖鑰盡歸周太保、韜鈴長護漢
西京、孝陵咫尺鍾山下搔首中原感慨生、

三

萬里滄溟遠建牙、重因居守與宣麻、莫言南北分天
塹、曾領華夷作大家、絕塞霜花生賜劍、故園鶯語雜
鳴笳、起居八座稱觴日遙指扶桑海上霞、

受勅

魏中丞屢抗章言事

上優容之居七年

詔

許歸養喜而有贈

七年獨握邊頭節、百歲欣承膝下歡、入塞始知親舍
近、辭官轉覺主恩寬、巢烏返哺情何劇、仗馬長鳴
影自寒、一著荷衣堪愛日、也應見日憶長安、

二

詔許中丞駟馬歸、歸心先逐白雲飛、欲將舞彩為初
服、自愛江魚上釣磯、海內幾人憂社稷、朝廷容汝
侍庭闈、主恩未報親仍健、且喜青山近帝畿、

送表弟宋元昭將軍度遼從李大將軍二首

麟編舊是魯諸生，燕領新懸塞上名。定有千金酬駿骨，何妨萬里度龍城。匈奴豈敢論甥舅，僕射真堪託父兄。幕下從來多國士，任安新屬衛長平。

二

雄關東向海天開，短劍長纓亦壯哉。自有終軍能破敵，誰云郭隗未登臺。雲銷列戍孤烟出，風捲平沙萬馬來。千載漢皇兼好武，肯教衛霍遜鄒枚。

馮琢庵先生北海集卷四

